

序

兩河造士錄序

霍 鑣 邑人御史

古今稱文章絕唱率曰先秦曰西漢然於淵源所自猶未也粵稽太昊氏剖混沌爲文明實爲萬世文字之祖是生隴右夫非西域之人乎由是觀之今天下文章雖盛於東南而其淵源乃在西北余奉命按兩河諸祭吏安民事與凡巡方者同惟是贅以觀兵較士不第奮武而且揆文厥任始艱心忤忤懼無以光聖世作人之化飲冰行役至天水質爲太昊氏故里學宮博士循舊事請謁拜瞻廟貌循覽龍馬穆然有太古之思焉蓋嘗縱觀宇內地不足東南則西北其所有餘哉關中據海內西北上游兩河又據關中西北上游譬之人爲四體之頭顱譬之物爲萬彙之根本是以古來開物成務之聖多產是地今雖邈矣山川猶是爻象具存觀風此際寧無感慨興起爲斯世斯文一振起靈秀以庶幾勝任而愈快乎於是所在進諸士而與之訂曰夫士先行後文余串功令不啻至再亦既知之矣惟是文亦談何容易爾諸士其務尋千古真意勿抄陳腐務抒一己獨見勿拾餽釘務發性天灑氣勿事軋茁余且於爾乎程實效諸士悉唯唯心

肯乃數集操觚售業諸弟子員俾竟一日之長嘔心而授之楮墨於是彙閱讐較益不勝瞇目遺珠之虞蓋至七月而科考竣十二月而歲考竣諸凡濬發巧心夙稱名士皆於暗中摸索得之其應甲子歲元弓旌翹然而解乎秦者潘生光祖也褒然而亞乎解者胡生有年也彬彬然而鱗次乎賢書者王生門弼李生必逾任生遠楊生純臣王生心學也則皆曩所較藝高等而極賞余日與夫曩所首肯而莫逆余言者七雋賦鹿鳴歸以所捷於闈者券余前言則意果真見果獨氣果無復陳腐餽釘軌茁之病余言效矣其以解額見置尙多憬然會悟之士豈得以其遇之拙而遂謂其文之不工耶今尺幅具在按圖索驥舍此何求爰以日所讎較彙選而授之梓題曰造士非謂巡方者能造之夫亦深造者自得之士固鍾其鄉之靈秀而挺生神聖之區其爲文章元氣渾淪識力矯健雅有秦漢遺風夫固有進乎技者若謂圓轉靈活不無少遜昆陵吳會之際然而淵源所自固已遠矣諸士勉之余將藉思皇之彥以報天子異日建鼓中原以其所造爲世經濟亦期於千古中信一已於一已中求性天且爲有用文章不作無根事業則茲刻也寧第爲蟻戰嚆矢哉行將與爾諸士問太昊氏之業非迂也

兩河甲子武科墨選叙

前人

古者造士具備六德六行故士負完養兼文武三代以下文武殊科遂畸有輕重矣明興昉古建制文武兼收碩輔鴻儒俱起家制科而武闈亦三載一舉率循故事不得卓絕瑰瑋之士而用之豈其盡自菲薄亡亦上之人廣勵未盡使然今博士家言一點朱衣之額遂懸國門汗牛充棟方且牛鬼蛇神咤爲奇寶試按其行卷帖括不過鏤脂刻冰卽工如宋人玉楮其于表餌之術固已疎矣又安知夫雕虫小技壯夫不爲而聚米爲山者之非眞經濟耶歲甲子兩河武闈余奉命按閱西郵實司其事選額雖稍遜省直然所賞拔皆一時材官駿品居恒請纓志壯敵在目異時脫穎而出固有建營平伏波之烈輝映五涼之墟者則茲者得僦士所持論策不爲之券耶又安可盡謂健兒駢枝一切芻狗棄之乎昔人云待以國士彼將國士自爲也是編之授梓不作砮砮之觀而作球琳之觀則照乘夜光且從此出詎得謂殺青氏之災也諸士勉之余日望之矣

畿輔較士錄序

前人

戊辰秋余奉命督畿輔學政三載於茲長此簡書弗遑籌處歷諸郡邑署再進多士亦再試之心日旣殫幸而竣事用是覆取其他籍藉者選尤而登諸梓旣成余不覺穆然有深感思賦英靈勃稱人地良有味乎其言之詎非鳳彩星輝苞苻攸寄吐雲觸石環寶斯藏自昔揚權文藝固多侈譚方域原本名山也乎自余承乏茲役循覽畿內奇勝步武所及西山拱翠南則恒嶽高揭北則碣石遙連翰軒矚眺蓬鵠幽深封龍奇聳而伊祈大伾之間堯跡禹功依稀在焉於是憑軾而嘆曰嗟乎茲非神門之所窟宅圖牒之所偉麗歟意其中必多聰穎雄雋韞荆玉而媿稽箭者及較讎之際縱現諸士所爲文章炳如澤如歸於大雅而一種慷慨沉靜之致躍躍楮墨間斯固其所秀發而挺生者乎蓋扶輿磅礴之氣鍾於山嶽而其儲與扈治也細者結爲金華銀瑛瑤草芝房其大者乃始蔚爲人文濟濟斌斌象靈奇人彰幽勝今諸士之牘具在唯山遂故其文密唯山峻故其文峭唯山逶迤故其文暢以達唯山嵯峨多者故其文磊落而英多余一再披閱而益知巖岫之蓋蘊蒸霞散綺如是其不爽也傳不云乎深山大澤實生龍蛇信然哉信然哉雖然余更有進焉詩之誦申伯也旣推極於崧高矣迺又曰柔惠且

直揉此萬邦至載讀文王之什亦曰思皇多士生此王國王國克生維周之楨然則魁人勝彥所以爲國楨而增重名山端可思已諸士以此爲羔雁且次第歌鹿奉登文陛矣尙相與茂勉之母沾沾博士家言使人謂予實皮相而且爲畿輔山靈所笑庶幾幸得士以報天子使者其與有榮焉

竹窗類編序

前 人邑人

古稱三不朽立言其一云第言不本之德性達之事功卽形成月露祇屬筌蹄藻揆春華何關殿最然後知三不朽究竟一而已矣邑父母任侯以關右巍科歷仕齊梁三晉所在德業爛然載在口碑旣稱不朽至所著述仕隱等集沉酣六籍搜羅子史如足鷄跖集狐腋而竹窗一編則發乎性天見諸行事尤爲深切著明歲丙寅不肖抱疾里居游泳汪濊於山林野性甚適然而憂時愛國畏天憫人猶稍稍縈結不能釋耳懷抱及我侯出是編相示纔卒閱便覺一時滓穢都盡不啻出之火宅而納以清涼蓋其爲言至易簡至精微洞達光明大類我侯品格是以真精鼓盪動物最神持此範世矻俗仁人之言其利普矣允若茲立德立言二者不一以貫之耶付之剞劂與先正語錄

共垂不朽也可

邑侯王紫庵詩序

霍之瑄邑人

古今大文字皆從六經中來而詩之一道自三百篇而後其風杳矣漢魏質六朝文唐人兼而有之雖風雅足傳究竟於六經無裨宋儒崇尚理學而性情之妙又復爲理學所掩以故詩人騷客徒侈揆藻之名學士經生未免拘謹之習人蓋知詩之爲詩而不知六經之皆通於詩邑侯王公以自心獨得之靈剖千古未有之奇作詩中詩而易中亦詩書中亦詩其中奇正離合險壯坦夷靡所不備可以鼓吹風雅可以羽翼聖經可以挽易靡之人心而不流於詭可以發性天之浩氣而不嫌於激唐人有其體製而無其識力宋儒有其識力而無其風裁所謂殮性情爲道德化朽腐爲神奇者已嗚呼大哉何道而致此歟夫公以浙中碩儒起家科名逖蒐浩覽沉酣典籍者蓋有年矣牧馬三載人歌樂只返以時窮見棄不得已而以補天浴日之經綸漫托之嘯歌吟咏中故凡所著作皆具有清明廣大之象不屑與時爲偶何者水激則波風怒則鳴固其常也而公之退處誰不爲公張目而扼掌者公若以牢騷放達之懷以自洩其不平之氣雖

精神所至亦足以及後人而不過與恃才傲物徒以伊哦消歲月者等耳公殆不然也將真經綸作真學問無遠而弗窮無微而弗探一言一笑無不與古聖賢出身相對其發爲精采香光真足喚醒癡夢驚破世眼絕不類憂時憤世者之所爲此其中有大過人者矣古稱三不朽公殆一以貫之也公之詩與六經并傳可也

張慎庵先生經書三集序

霍燦

慎庵先生鐸吾邑歷十有八年遷蜀之長壽令昔人以青氈絳帳爲師儒佳話而不知官至廣文冷矣廣文至吾邑其冷狀更莫可名似先生以名孝廉稱文章宗匠而乃屈就一氈塞上風味奚啻冰蘖苦歷十八年之久而後得以百里報遷也嗚呼難哉今先生行有日矣適余不肖因秋幃之便歸省家慈得爲先生一舉酒唱驪酣飲劇談之下先生乃出其所註四書字解五經考畧及明文辨體三集相示余未及卒讀而爲涉獵其大概知先生十八年中口不絕吟手不停批一惟聖賢之精義是究而其與諸生所講求者非先生之法言法行不以矢諸口被諸筆墨也嗚呼先生之垂訓自茲遠矣吾晉號人文之藪風雅之林歷代以來彪炳史冊者實不乏人然要以河東爲最文章如

司馬公觀止矣而闡精一之源研性天之奧則惟文中子與文清公稱理學大儒先生生於其地而克紹其統茲所註解更以發前人之所未發用示後學使知精義至理不在章句之中而亦不在章句之外惟潛心體認融會貫通至於涵泳之久而文章出其中經濟亦出其中嗚呼先生之垂訓自茲遠矣所謂百世以俟聖人而不惑者寧第及門二三子幸親炙之多年哉今先生行有日矣諸弟子員沐先生之德教而悵然不忍別者蓋濟濟然也而家弟乾生姪子子厚與甥田子聘侯表姪郭子從夏則尤深荷品題朝夕趨承奉先生之規矩準繩爲舉業宗而茲於其將行也均依依不能舍爲余述先生之德教歷歷余曰汝輩惟不忘先生之教身體而力行之能讀先生之書則亦猶侍先生之側也况先生宏才久屈今日者鱸脚旣兆大猷允升雖百里亦未足以展驥足而以余所聞錦江玉壘之秀峨眉劍閣之雄固昔杜工部遨遊吟咏地也先生蒞止必不屑如塵俗吏日勞勞於簿書會計之中而政事之瑕方且進彼都人士與之敦詩書而悅禮樂文翁之化將再見於今日之巴蜀矣日暮間以治行高等超擢優異則先生不握銓柄必掌諫垣汝輩有克自奮發而與選賢書以上公車者乎請從長安道上



與先生投刺而修舊日之好

霍氏崇祀錄序

于漢翔督學僉事  
金壇人

從古貴家大族惟世其德者世其官雖其人能自樹立則然亦天之報施不爽也余自視學山右衡文之暇每上下今古留心賢士大夫之林於凡郡之乘邑之志周知而悉攷焉其享大名顯當世者所在多有大都晉之地山高而水長其所鍾英皆樸茂醇正卓卓可風而立德立功立言各負所長以聲施後世間有爵秩尊崇而德未醇者修於家矣或未光於國卽光於國矣或未厚於鄉一傳焉家落矣再傳焉則家日益落求其詩禮綿長簪纓奕葉多不槩見蓋備德若斯之難也今考雁門霍氏爲雲中望族自南峯公正己率物起家學博有古大儒風至韻衢公讀書勵行克敦孝友其修於家如是及居官也值貂璫蠶惑之秋亮節忠貞遭貶削而不悔問嘗從山西通志中讀其奏議如請昭信史請任老成及雲鎮兵荒諸疏皆危言讜論備載史冊其光於國如是而當在臺中時念切桑梓請蠲逋請賑饑諸凡憐人之孤恤人之寡深仁厚澤不可枚舉其厚於鄉復如是韞齋公少孤力學克繼祖志居家立朝悉如韻衢公而救荒修城二事

尤大有造於其鄉者晚年蒔花種菊怡情泉石間則又謝東山王輞川之逸情高致也其祖若孫後先相繼俱堪師表一世邑之博士弟子員俱誦其世德不衰因合詞公請上臺俎豆聖人之側血食公家蓋三世於茲矣其鄉之父老歌思其德近復爲韻衢韞齋兩公鳩衆捐資播其善行勒之瑱珉樹諸道左誌不忘焉此以見公過之不泯於人心夫亦二公之德有以致之也余因其後裔執卷問叙於余闡揚風教表章前賢固學使者責也余固樂從其請爲述兩公之生平以表於世竊冀當世薦紳先生宜以二公爲法惟在其人能自樹立而天之報施乃不爽也書曰樹德務滋霍氏有焉

霍氏家乘全集序

張體壯教諭

憶乙丑秋余抵寰州時得晤韞齋先生端凝簡默善氣迎人蓋心知爲有道君子也嗣後貞生煌生諸公子輩晨居夕共與余頗有風雨之好而貞生煌生輩醇謹老成依稀韞齋先生家風則皆所謂能稱其家者獨生公秉鐸漳源室邇人遙輒以不得一見爲憾癸酉春以韞齋先生乘箕之變震生公家居讀禮余始望見顏色然而塞聰蔽明杜門不出三年間又復莫予云覲也服闋始日相投刺把酒論文甲彼乙此震生公每出

一語余輒倒而余問出一難震生公亦未嘗不心醉也無何又爲補鐸漳源山川迢遙伊人徒切至壬午秋震生公闈試告竣便道省慈一日過余學舍手出一帙屬余爲序啟之則所爲霍氏家乘也是震生公不以余爲陋而余亦樂得震生公之帙而觀焉因爲按其譜牒覽其世系稽開先之由來察後裔之分派鏡世德之積累考家學之淵源其捷南宮者韻衢先生倡於前韞齋先生繩於後凡二世附廟食者南峯與奉政先生俎豆已久韻衢與韞齋先生几案重新凡三世衍詩禮襲衣冠者提舉先生以慮其始後嗣諸賢以繼於今凡九世其自始遷公以至於茲瓜瓞綿綿族屬蕃庶者蓋十三世載在譜牒班班可考顧此譜牒之作也草創於韻衢先生討論於韞齋先生條分縷列纂集彙成則在震生學博書成三世時幾百年蓋家乘若斯之慎也獨是震生公鴻才卓識積學邃養使稍自需待則桂林杏苑奚難與韻衢先生分輝韞齋先生濟美而顧以明經鐸士揆其時年方弱冠耳余於震生公不無牛刀小試之惜抑亦占震生公之所蓄彌深而所流將彌遠矣蓋天地往來之機人物屈伸之故消息盈虛循環不易則震生公之不盡其長又安如震生公之不將大其後耶余觀宇內之士有世其爵者矣

有世其資者矣而端凝醇謹世德相承則未有如霍氏一門者語曰仁者必有後况世德哉然則世有不知霍氏之後者請以其世德卜之世有不知霍氏之世德者請以其家乘徵之

霍氏月旦考序

張 濬邑人明經

吾邑霍氏之先日豐州遷籍歷世八葉至南峯公起家學博篤生韻衢公爲有明名御史因論魏璫之奸被削懷宗御極賜環益感憤興起急上昭信史任老成及重鎮兵荒諸疏皆報可簡督畿輔學政甫報竣擢置銀臺盖上方倚以治平而奈天不作明不使憇遺一老甲申之變北京之銅駝既委西來之鐵騎方橫諸縉紳舊家無不被其荼毒而韞齋公年方弱冠乃談笑而應之其膽其識超越千古已而繩祖武捷南宮西粵有明允之頌東魯永甘棠之遺逮簪筆鳳池而忽動尊鱸之思怡志泉石遂以終老焉此其祖若孫清風勁節均堪楷模後進海內學士大夫咸有耳目而獨是惠我桑梓澤及子孫恐天下後世未之或知也當韻衢公在臺中時疏豁本邑無徼荒糧二千石至今吾邑之民含哺而嬉遊者皆食德之孤耳洎韞齋公退居林下值三次太荒公煮粥飼

餓減價平糶所全活無算癸亥地震城崩公捐貲修築不勞邑中一民不費邑中一錢  
歿之日邑人哀之如喪考妣爲請於學使者錄祀廟廷而邑人之意猶未第也迺糾衆  
伐石豎之道左書其累世陰嚙鄉里感頌之出至今過者莫不墮涓比之峴山碑蓋古  
今同轍云方祀典肇舉與此碑之初立也韞齋公諸子目覩鄉人踴躍從事皆泣下傷  
心而其冢子漳源學博君尤不勝衣裳楛棬之思先是投牒憲司續梓韻衢公之奏疏  
誌銘於晉省通誌中茲復纂集崇祀錄月旦考彙成家乘一書而丐余鄉人一言以冀  
久而可徵余謏劣無文可能發奕代之幽光而闡累世之潛德亦惟就耳目之所親聞  
見者聊述其梗概使他日霍氏子若孫覽茲彙編而動繼志述事之念源深者流自長  
德盛者報必隆是則學博君所望於後世子孫之意也夫是則余鄉人所共望於霍氏  
後世子孫之意也夫

箴

不動氣箴

霍 鏌

人負我已虧我我動氣又虧我是人之虧我一而我二之也人負我何傷我我動氣始

傷我是人之傷我淺而我深之也人負我咎在人我動氣咎在我是人之專咎我分而任之也人負我我怨人我動氣人快我是人之俗情我全而收之也右不動氣之理橫逆之氣

可以妄人消之古云非義相干可以理遣報復之氣可以不校消之古云寧人負我莫

我負人污蟻之氣可以知希消之古云行修謗興德高毀來俗緣之氣可以方外消之

古云天地一指萬物一馬右不動氣之功不動氣則心靜一靜可鎮羣動以馭頑俗是持物之

道也不動氣則形和一和可消百戾以却疾病是保身之道也不動氣則理得一理則

制衆欲以端趨操是禔躬之道也不動氣則天定一定可當萬變以綏福履是利往之

道也右不動氣之效

賦

返照賦

霍 燦

一之日廣莫發發玉葉昏昏四望瀟條一寒棲楚嘆景物之都非不覺淒涼之盈目矣及夫日薄咸池雲隙中烏光射宇門詹飛赤而金屋輝煌榆際落黃而綵樹炫耀時見寒鴉鳴于古木有哈嘎聲牛馬散于平原有咆哮聲此間有真意誰道邊塞苦寒哉余

臥不復僂，擁衾而起，復披窗而望，擊掌而歌曰：返照西施兮，四運終矣。六騎過隙兮，忽焉投矣。無長繩以繫白日兮，倏今朝而明夕。得大福以騰青牛兮，與天地而無期。元會爲天兮，崢嶸爲壽。富貴非樂兮，貧賤非悲。寄委形於亭毒兮，勞生之景假。文章于大塊兮，福位之梯應。龍潛兮，潢汙和壁藹兮，荆石嘆英雄之未遇兮。少年欲去，撫流光之易逝兮。歲不我與，失時從事兮。聖人不可爲樂待來兮，塵世爲嗤。春風流鶯兮，語日夜雨寒蛩兮。鳴時順得失，以不怨天兮。吾其安命矣。奈歲月之不待人兮，將如之何矣。安得長戈千丈兮，挽住天樞，待著勳猷于竹帛兮。長嘯而歸，歌訖夕陽西下，陰風栗烈，怒號一聲萬噸，盡發。于是山嶽爲之斂形，星月爲之隱躍，余愀然而悲，肅然而冷，閉戶秉燭，方夜讀書云。

廣憎蒼蠅賦

霍燦

原夫蠅之爲物也，渺小精怪，無處不到，不識造物者何心，而假之羽翼，若故與斯人爲讐也。歐陽子憎之作憎蒼蠅賦，僕讀其文而有感，因廣其說。昔袁中郎著廣快編覽者，情怡以先生雖嘗官學博，然實快人耳。僕本多恨，故未能廣快，而聊以廣憎。爰賦曰：造

化無端兮生此醜類趨炎附熱兮呼羣逐隊其多勝於出垤之螻蟻兮其聲不必聚蚊而若雷但恣已之饕餐兮弗容人以假寐高堂大厦錦屏繡幃每鑽刺而善入恒奔競以不離衣服失其素潔飲食變其芳菲翳惟爾之善點染而工蠹亂兮夫豈僅於止樊而止棘若乃時逢溽暑汗流雨滴思往逃之黑甜之鄉庶神遊於羲皇之世而爾乃薨薨揖揖嚶嚶趨趨若顧影而突來不轉瞬而畢集領以赤頭號曰景迹雖無蜂蠆之毒大有吞噬之意於斯時也非無拔劍而斬之者而爾不懼亦有揮塵而驅之者而爾營營不屑去也方東撲兮爾四竄及南攻兮爾北移仗酷吏之行權如狐假乎虎威惟膏脂之沾濡俾簾幙之掃地余竊怪乎爾之肖形也能飛北於鳥乃凡鳥二足而爾六之善蝕擬於虫乃凡虫一嘴而爾二之是以雖無利齒兮厥有鳥喙佯爲弱羽兮乃騁捷足以余所聞振古以來薄海之內其受爾污而被爾損迄於寤寐弗寧者蓋未可更僕數也而爾乃鼓其舌飾其詞以巧辨於人曰吾乘陽生兮聿隨陰伏惟春蠕而夏飛兮乃秋呆而冬蟄偶同齊人而之蟠間兮彼方行乞而吾已裹腹曾無妻妾之堪驕兮獨携朋儕而徒哺餒達乎大火西流萬彙瀟瑟世皆悲紈扇於秋風兮吾已藏形而息機



且夫物之剝人肝肺吸人腦髓者比比而然也而其或吮癰舐屋恬不爲怪竊潤分甘終身而不飽其慾者其貪其穢視吾將不啻乎倍蓰人第見詩人之比吾於讒夫而謂之交亂罔極兮不孰揣與吾語冰而茫乎未之或知是亦氣化之流轉而吾特率其固然兮彼廬陵者固賢人也而何獨於吾乎欲加之罪母亦虞集誅伐之虛文而張詠怒罵之故智也歟噫逞爾之技惑爾之言宜若無惡於人者而豈知奸不在大愈小愈多害不在顯愈微愈深便柔佞嬖惟爾兼之耶故夫雀可憎兮止穿我屋鼠可憎兮止穿我墉寧如爾之么麼其體羶貪其性爭眉睫以毛求入幃簿而血食及乎族出蛆臣遺臭種種違恤人之掩鼻而蹙額切齒而腐心者哉歐陽子憎之今其人已遠矣僕之恨之殆未易以終窮焉不有毛穎君曷抒此憤而若欲興問罪之師以討爾於枕席之上及乎肘腋之間也則僕亦終未能效終軍之請纓而祇自附於賈太傅之一二太息

詩歌

七言古

遊神頭山

王一鳴 知縣

神頭山下黃道泉故老相傳幾百年天池飄墜車輪在金珠又見七魚穿出沒潛通寘  
奇絕混混日夜崑崙泄共工觸倒不周山大柱折兮地維缺脉絡直衝尾閭開萬丈洪  
濤一滾來滄的神婆無去處携兒奔上北山隈氣喘神勞體無力手按山頭暫憩息曉  
起窮荒乏鏡臺牙梳塵滿無人拭神婆發憤氣猶龍推倒雷山一二峯東海順流千里  
去週折關河幾萬重半灘遺與幽人寓問津嘗訪桃源路白蘋紅蓼傍晴川野鷺閒鷗  
依晚渡春回淑氣正暄妍勝日尋芳述古聯兩個黃鸝鳴翠柳一行白鷺上青天南薰  
披拂景悠哉傲暑閒將好句裁一水護田將綠遶兩山排闥送青來牢落烟霞值晚秋  
古人佳製與今謀殘星幾點雁橫塞長笛一聲人倚樓太呂吹殘葭管灰霸橋詩興慢  
敲推岸容待臘方舒柳雪意衝寒欲放梅遊子關山應有約四時風月休閒却翻雲覆  
雨隨浮沉海角天涯任飄泊回首長安雲路遙參差樓閣傍層霄瓊筵金縷消長日寶  
鴨龍涎俟早朝孤臣流落窮荒域風起塵沙天改色三月忘味豈聞詔數間破屋聊爲  
息故鄉遙望白雲邊雁門紫塞互相連舉目江河風景異陰陰高柳不聞蟬萍水相逢  
一二客笑談共坐三生石隰水冷冷含太虛塞風浙浙浸瑤席水哉水哉逝不窮曾悲

嘶馬飲西風而今萬里長城在仗劍崆峒氣若虹奮然一指星辰落堯天蕩蕩祥光燦  
喜逢河潤海波澄活水源頭分一勺易水寒兮沂水溫此水夏涼冬煖存浩浩七泉通  
地竅洋洋千頃接天源坎德醇良調五味造就飲食和腸胃海鹹河淡醴泉甘玄酒太  
羹天一氣君不見名川巨瀆滿中原銀漢潯湘雪浪翻勝地無人不贈句良辰有客便  
傾罇嗟爾七輪生邊邑浮光靜影乾坤翁夜闌皎月照寒潭璞石獨有卞和泣矚付山  
人莫把滄浪輕留與時賢好濯纓好濯纓奮力輔聖用一朝挽回天池水池絕邊陲萬  
古清

游金龍池擬古

東牟王日新本縣令

金龍金龍幾經年于今池上水潺湲一泓清碧可人愛凭欄欲去又依然我聞神品匹  
九逸追風逐電還稱德一朝際遇良將才長安日照黃金勒敬德梟雄軼千古單鞭奪  
稍人爭詡山後誰知烈士名池邊浴馬救英主聞難當年躍馬來雄信膽落水之隈勤  
王不用飛羽檄氣如潮吐聲如雷帳下初標虎士名解衣同榻心已傾雄圖俠骨俱銷  
歇凌烟遺跡尙轟轟池水東流波蕩漾廟貌巍巍池之上島夷年來正陸梁東征安得

如公將余家海上時方苦倭故云

過尉遲敬德廟懷古

潘榛主事

鄂公英風古無比此日過公之故里里中祠廟肖遺容血食伏臘無窮紀毛髮欲動色  
欲嗔行人瞻之肅焉起祠傍猶有金龍池人傳天馬生池裏爲龍爲怪故不馴公目伏  
之如螻蛄跨來酣戰幾百場劃然隋楊始定李我仰高踪一此避低徊日暮脫劍履潺  
潺池水西還東落落羣山帖與岷水流山峙古今同英雄戰骨今枯矣

慈鳥歌

霍鏤

君不見慈鳥返哺報其親大嘴鳥唇仁爲心飛來飛去故林上猶如定省力晨昏嗟嗟  
萬物誰無母不似繫繫孝道深爾念爾親恩罔極長大不忘少時恩記得伏卵劬勞日  
雌兮爲子忘其身雄兮憐雌終日貪朝朝暮暮鳴化林一朝出卵能爲食雌雄遞哺致  
慇懃慇懃已經三兩月皮毛脫盡骨無筋從前費却千般力養得翩翩羽翼成奮翅直  
冲天際表迴風舞雪上穿雲回頭時顧鞠我者舊巢憊骸尙呻吟長嘯一聲真性發潛  
然出涕淚沾襟歸來不避勞與瘁寧饑吾腹臞吾躬從今伋伋將親報猶懼桑榆不得

伸嗚呼慈烏兮性淳噫嘻慈烏兮情深嗚不鳳搏非鷗一點靈機萬物讓其仁志行羞  
吳起腹內有曾參盡綱常於父子媿峰蟻之君臣嘆彼物之若此亦可愧乎吾徒之爲  
人

奉慰霍鏃衢年丈哭子過慟

劉餘佑

兵都尙書  
宛平人

噫嘻人生真一夢卽有有傷心何過慟丈夫胸臆自有天肯造化小兒弄任彼風雲翻  
覆來在我確乎不爲動厄莫厄兮惟去妻悲莫悲兮家去兒夫哭妻父哭兒夫爲妻殞  
誠誤矣父因子病又何迷君不見西河之賢忽投杖而悔其過又不見路傷子無榔孔  
轡竟不輕爲佐聖賢於此衷菲契生死關頭應早破我則謂顏氏不夭好學未必專其  
名伯魚不死子思未必篤其生達人務籌夫遠大母謂情惟我輩鐘君今者桂蘭滿膝  
槐棘縈孽天或促長公爲回而牖公孫如子思使之經術興家名世救時是積慶者之  
必然豈真運數不可知噫嘻國多難主方此勸君豎起匡王骨敢擬枚叔之發詞

楊雙峯邑候幕客黃澹山楚中俠士也以長句索和依韻答之

霍之瑄

風雨驚來煙浮紙至今猶說少陵史有客欽崎復歷落寓內再見奇男子男子何媿貧

無袴投筆期坐將軍樹人生莫爲造化苦朱門齷齪促步武端木結駟原憲貧侏儒祝  
此徒逡巡吾道精義能人神錦囊富有日有新日新雲霞燦瑤篇繡虎雄才直無前高  
峯萬仞矚北斗嘔心奇句問蒼天蒼天茫茫難細覈左圖右史擁敝席古來坎坷類如  
此赤虹一吐透肝膈丈夫七尺本不虛逢人漫歌楚江碧願借清風消溽暑竚見國士  
囊中處與君煮酒論英雄盛世安復有巢許黃金臺前堪憑眺應知日月無偏照千秋  
事業儲三湘今古雲山豈殊調感君意氣重如丘把臂風前一長嘯

紀遊和韻

有引

霍燦

乙亥十月朔五日攝篆山陰周明府邀同都閩趙將軍暨諸令戚貴友於金龍池網魚無獲乃登洪  
濤山問水之源已至河西小圃席地而酌抵暮方歸次辰即請先君子主人祝鄉賢又逾日其幕客  
沈君以紀遊大作索和因次韻答之並呈明府脚價免派通邑皆荷生全若先君子籍手不朽尤其  
後焉者也佩感之極不覺情見乎詞

地極邊來總不春二月東風未解凍寒潭那得有潛鱗荒山如滌堆石重人人蠅頭爭  
逐羶幾家素封能別衆去年七月飛霜來比閩虛空似懸甕輪輓若於不通舟有限民  
力無窮用頽尾何堪竭澤漁貧苦所望父母洞祇今宵旰厪深宮吏議奚當成市閩大  
賢舉事宣殊常才逢盤錯方展縱亡厚姬公久著名飛霄酒潤隨騶鞞斟酌變通肺腑

流糗儲便我自裝送惠懷四海爲一家清標五夜琴三弄祇今召杜更何人歡騰蔀屋  
轟雷動山馬比鄰屬舅甥正供踴躍互勸諷惟公大雅婉多風公餘覽勝屏儀從相携  
名碩玉森立釣魚賦詩飲劇痛停午聯轡過荒園野人有酒兼芹貢坐上宋室貴王孫  
細柳威名師中頌朱輪不鄙舊青氈鷺鷥無嫌側鴛鳳休文隔日郵詩來因而續貂學  
鳥哢傷心陟帖已三年先德感人勞寤夢荷公迎祀非茫茫俎豆春秋永二仲生成大  
德曷敢亡不效顰作俚誦

七言排

讀霍韞齋先生序集家乘賦贈

黃映秋字澹山  
孝感人

涼颼驚客動單裾往事如雲過太虛早起藝檀開一卷文情移我過三閭孝思慘淡經  
營際風木悲傷感慨餘令伯陳情孰至性先生侍食娛端居科名有道繩先德珥筆無  
遺起令譽祖父自斯垂實錄子孫從此得傳書始知龍德爲霖雨先遣天懷入遂初霜  
露千秋開造化鳳麟百代毓階除雕龍繡虎綿家學調鼎和羹補石渠三立參差彰世  
澤九如次第咏猗歟北堂桃實觴慈母

時先生大母陸太  
恭人八表大慶

繞膝孫枝佩賜魚細檢編年搜

世略天公福善殆徐徐

七言律

謁鄂公祠

蘇天佑御史

閣頽遺像凋生色池古祠荒俯碧泉天馬千秋空渥水雲龍一代已凌煙可憐契合風塵際大羨飛騰戰陣前旗鼓倘仍懸大將於今長賀太平年

冬日同申立野岡卿李雨山兵憲

游金龍池

郭性之參議

池裏龍飛不計年龍門雙節駐龍川池流影漾桑乾月龍馭羣空冀北天喜御仙舟還泛泛愁看鳧寫欲翩翩留君莫厭平原邑一別雲橫萬仞巔

題金龍池

永年馬之麟朔州守

平泉噴玉湛深池派衍桑乾古渡湄汗血浮蹤傳尙信泣珠潛室轉生疑洪濤沒石述天塹細潤與苗入野陂直向盧溝橋畔注金湯千里壯皇維

水圍寺

前人



池塘疑碧沁漣漪中有琳宮鎖翠微四壁光涵圍夜月三冬氣煖映朝曦鐘聲斷續閭  
閻隔花影扶踈僧舍宜坐久塵襟渾滌盡頓忘蓬跡寄天涯

夏日遊金龍池漫成一律

一絕簡王茂宰

關中辛志登左參議

平生故有烟霞癖每到登臨便不還自向龍池來睡賞誰驅車馬去問關濯纓苦憶綸  
巾白把扇懸驚舞袖斑無那雙飛天外鶴致身千仞杳難攀  
立馬郵亭拂袖塵炎蒸消暑水之濱幾回欲向臨池醉只恐清溪解笑人

文明塔次宋邑侯韻

霍 鏐邑人

五雲冉冉落毫端直上青霄俯衆山遂可擎盤承玉露也堪棲鶴耦蘭岩高揮星漢風  
生穎平拂煙霞月掛龕西北漫云多缺陷好將天柱九州傳

又

前人

孤標突兀倚雲端堪輿重瞻砥柱山二水瀠迴情脈脈千巒擁護勢岩岩影搖劍氣連  
牛斗文映奎光射佛龕會是管城多變化橫飛彩色古今傳

遊水圍寺

東牟王德新前容城令

梵王宮殿敞朱扉夏日携樽入翠微地靜紅塵無處着雲深白鶴有時歸  
網緼嵐氣連千嶂瀲灩波光繞四圍佛如來真境界山人留偈欲皈依

過水圍寺

漳浦楊一葵副史

夾路垂楊蔭古堤行春聊一探幽棲江天日麗羣峯霽劍戟霜明萬馬嘶  
檻外浴鳧紛共語山中稚子喜相携閒愁到此渾忘却縱飲何妨醇似泥

前題和韻二首東魯

張中鴻左布政

蒼蒼山色映芳堤爲愛池亭暫此棲翠荇牽風共浴綠楊含霧馬頻嘶  
澄潭聞記雙龍化絕塞惟將一劍携漫捲湘簾飛紫燕梁間勿訝落香泥

梵王宮殿鎖荒堤地迴偏宜高隱棲香裊博爐僧入定花迎征蓋馬長嘶  
環臺碧水疑無底襲袂白雲似可携且喜榆關烽暫息憑君重倩一丸泥

又四首海岱

張中鵠

古剎煙籠倚繡堤溶溶碧水抱禪棲上方清磬聞僧語夾道錄楊聽馬嘶  
世外煙霞探

便得夢中焦鹿豈堪携况逢賢主能相款適意何須羨紫泥

離披草色綠楊堤雨霽閒雲樹杪棲鐘度曉風驚梵唄泉穿石溜瀉哀嘶籌邊艾可三年蓄覽勝圖將五岳携清賞且拚今日醉升沉何必嘆雲泥

楊花飛雪颭香堤一水拖藍遶梵棲檻外魚遊鷗欲下池中龍去馬猶嘶山僧共話風幡動旅客空將書劍携家在夢中猶未至一尊聊此踏香泥

白蘋紅蓼映煙堤片片閒雲護竹棲鄂國雄姿猶盼蠻金池龍馬尙驕嘶望中煙樹思如結客裡鶯花酒漫携試向禪關詢老衲蓮花何日出污泥聞池中曾栽藕故及之

過馬邑宋明府要遊水圍寺

臨池泛舟二首

濱棗劉餘澤按察使

何來雁塞得龍湫行色還因地主留林水賸餘濠濮想蘭舟不減習池遊芰荷入夏紅

芳歇

明府曾種蓮未發

葭菼連天碧浪浮無數白鷗窺客去應嫌車馬點滄洲

古木陰陰曲檻底石亭窈窕枕招提逢僧細問金龍事對酒閒聽翠鳥啼水月漾沙時上下曇雲拂樹自東西山光欲暝猶遲戀可奈紅塵促馬蹄

奉慰霍直指被削歸山

任澄清

雲暗桑乾二月寒  
颼風驟雨起波瀾  
是非論久方纔定  
毀譽由人且目寬  
噪夕寒蟬藏  
葉底朝陽鳴鳳動  
長安聖明不負蒼生望  
指日重新獬豸冠

和前韻

霍 鏜

長嘯歸來風雨寒  
中流自笑砥狂瀾  
何妨世局雲泥轉  
且喜皇恩天地寬  
蕉鹿夢回身  
是幻海鷗盟狎意  
相安承平但願長  
如此不惜孤臣早掛冠

霍直指別業觀龍池

任澄清

一派汪洋架彩橋  
水晶宮殿雨瀟瀟  
風掀浪巨浪聞吼  
月擁清波見海潮  
鷗鳥忘機眠  
翠柳樓臺壯麗薄  
青霄中流砥柱狂瀾靜  
滿目雲山景色饒

霍直指龍池別業用任令韻

鄭時舉朔州守

清流一派下山橋  
草岸盈盈起迅颼  
萬丈洪濤驚怪湧  
滿川餘潤應江湖  
浮鷗晝夢閒  
青墅古木雲蒸插  
碧霄堪羨此中多  
逸致暇來嘯傲興偏饒

次前韻

霍 鏜

水斷長堤續小橋激湍靈籟響森瀟銀河傾瀉驚風雨碧海依稀聽沔潮檢點虛舟空  
世界凭臨浩月冷雲霄干旄况復來仙令從此山林趣更饒

霍直指近水樓飲薄暮泛舟龍池

鄭時舉

高樓席罷錦帆開簫鼓中流亦壯哉薄霧平鋪溪影寂微風乍動水紋來燈明兩岸驚  
龍窟月印三秋近古臺慷慨主人多逸興何妨沉醉臥山隈

和鄭公祖九日泛舟韻

霍 鎮

登高四望笑顏開復盪蘭橈更快哉岸柳迎人分緣過淵魚弄月耀光來參差歌管催  
行酒寂寞煙波冷釣臺借問蓬瀛何者似仙舟共泛白雲隈

又

前 人

卜築林泉三徑開水禽山鳥盡時哉巢居漫作羲皇想雲臥疑從蓬島來投分喜相逢  
鶴侶夢魂飛不到烏臺連年召杜頻懷舊幾度題詩傍石隈

林居漫興

前 人

宜須海上訪安期且盡生前酒一卮幽壑時聞靈嘖發閒庭不厭好花移立朝昔覺孤

馬邑縣志  
踪險遺世今忘多口滋却笑耦耕亦多事迷津何必問阿誰

馬邑卽事

陳灝

榆葉參差蓋野蒿孤城超遞滯空濠河流東去川原合山勢西來劍戟高朔漠雲橫歸雁杳寰州日落野鳥巢古來忠節知多少誰向當時數聶豪

新春喜雪

任澄清

昨宵滕六駕飛輪暗送瓊花報早春庾嶺敲殘梅蕊落梁園點綴柳枝新灞橋驢背詩思遠夜棹山陰興趣眞最愛陽春白雪景好將樽酒賞芳辰

前題和韻

霍鏌

風吹玉葉掩冰輪六出平鋪大地春舞絮乍驚時序改烹茶偏覺物華新藍關擁馬忠還篤瀚海吞裘節更眞黍谷幸逢鄒子律敢云難和負良辰

題鄂國公祠

聶明楷富明人

太宗神武削群雄摧陷當年首屬公自是虎臣清海內豈眞龍馬出池中辭婚不奪糟糠志喋血終成社稷功金輦如山何足動却教假此拜英風

春雪

霍 鎮

寒胎白質自天成飛下人間作態輕玉屑舞成花世界冰葩粧就素乾坤隨風柳絮敲窗急拍地梅花映枕清三白已占今歲稔看來造化有先徵

乙丑歲杪西巡役竣北上晤吳玉麓年兄於自登道中今戊辰乃荷疏薦有感

前 人

自登道上喜相逢爲問朝端有四兇報命宣綸均國是歸山捧日兩萍踪豈期正氣還千古尤羨匡時第一封拓落自從題品後蒸蒸海內慶雲龍

哭陸懷潤茂才

華存樸處士僑寓

迢迢鸞御薄青雲忠告應從地下聞莫去玉樓仍獻賦休臨泉府再修文靈心剝骨從趨溺慧業剗腸祇自焚好把生平齊霧散任風吹蕩作閒雲

寰州卽事八律

杜如錫知縣稽會人

縣治

秦時卜築屢曾更有馬盤旋邑始成廣武猶存兩舊蹟廣武有新舊二城桑乾空遶一荒城民稀

難續逃亡籍地蕪偏餘老幼丁謾說雲中諸郡縣普天莫比此凋傾

風俗

最是寰州俗可嗔無分貧富不知勤豐時豈但惟膏食儉歲猶然只酒醺男不耕耘皆廢土女無紡績少腰裙剛纔賣得兒錢去持向街頭賭幾文

天時

四序常寒久未休每逢六月早披裘罡風括地沙穿牖紫雪凝山日上浮  
甲析勾萌需夏日葵黃菊綻在冬頭年來雨澤還鮮少長使官民事禱求

雪蒙沙土日色映照其色如紫

丁糧

最苦丁糧民力疲丁糧說起淚堪垂家無以次多重役戶不盈千倍數追

馬邑每丁納銀自一兩至二兩

三四錢不等民苦不支

自髮龍鐘無脫卸黃童鵠立恁撐持可憐戶絕餘孱弱猶似從前按籍推

絕戶

一丁者猶賠

包十餘丁

貧瘠



殘黎幾個困茅扉城市鄉村總尙稀戶有重糧多露處家無隔宿忍朝饑支離疑出沉

疴後

民皆菜色有如抱病新瘥

敝垢還同乞丐非自古鶉衣猶百結而今半是赤無衣

誌荒

向道奇荒荒不如可憐赤地草無茹米珠那見盤中粒薪桂徒勞爨下餘猶幸巡行來

召伯可知發粟有長孺

各憲捐俸分行賑濟民賴以食

余因設法留倉粟暫濟貧民數月需

避徭

馬朔隣封徭寔殊朔輕馬重避將無朔因寇亂翻新籍馬傍孤城依舊圖

朔以姜變破城圖籍盡燬新編

遂稍減邑仍舊額故民多得支其苦最不堪言

地界無分誰細辨村民錯空漸忘區

朔州與馬邑地錯處并無疆界可辨

堪奇更復還

堪笑一樣丁糧兩樣輪

造車

馬邑由來苦旱荒官民無策救蓄傷那知一曲桑乾水可濟千頃赤地殃

縣境桑乾一河環遶得水車法

便可救旱

輓轡須知隨上下桔槔還應度疆場

山坡地勢高下不平車時尙須相度經理

急將此法除前困過後殘

黎得稍康

民貧乏資無力造車余欲捐俸先造十餘部本地舊無匠作須江浙吊取尙須時日

前題和韻

霍之瑄

縣治

嶄山堙谷喜紛更卜築寰州百雉成桑水滌洄秦社稷洪濤列障舊長城樓臺倒卸空  
遺跡戶口凋殘只數丁最苦川原震動後民居公廨一時傾

風俗

儂薄相尋囂競紛田園荒盡不知勤絃歌處問聖賢業沉緬難將道德醺野乏桑麻廩  
乏穀男無襦袴女無裙漫云一擲千金易乞丐那曾有半文

天時

日日塵霾未肯休夏來猶自着冬裘飛沙迷日雲光淡積雪凝冰冷氣浮却喜董風吹  
畝畔早憂寒露墜山頭頻年多失農人望但慰雲霓無別求

關外地寒風猛無年不旱而今已已則竟歲不雨矣

丁糧

心勞撫字拯癘疲鞭撲難施空淚垂百畝荒田徒在籍一丁數雨向誰追征輸剝却心  
頭肉顆粒猶如掌上持前逋未清後逋續欣逢皇恩廣爲推

康熙二十九年丁地錢糧奉旨盡蠲

貧瘠

無計活生扣別扉寥寥數姓爨煙稀蓬蒿啖盡難成飽草木啣來暫救饑糲食應同犬  
彘是奔忙欲作馬牛非堪憐顧影成溝壑那討寸絲身上衣

誌荒

家家懸磬待何如米絕吹兮菜絕茹屋裏糟糠捐棄盡懷中襁褓道旁餘圖存無望三

秋穫救饑寔鮮一粒儲天道十年應再變庚申己巳疊災居

庚申旱荒人剝樹皮而食己巳更甚

避徭

邑隸朔州相距止四十里杜公以朔人稍贍公額易辦疑苦樂不均或避籍而從經然乎否耶

犬牙相錯有何殊朔日盈寧馬白無丁減銀添原晉籍差繁戶絕宜更圖流移究是浮  
萍草土著那曾改舊區豁得逃亡數百去現存徭賦不難輸

造車

年年未稔又逢荒瘦骨那堪再餓傷桑水迴瀾挽得住驕陽雖烈豈能殃連阡麥浪須  
車湧逐畝渠穿早築場相度經營賢宰力從今下里望豐康

前題次韻有引

霍韻

己巳之歲太原以北皆報災而雲屬特甚經年無兩寸草不生鬻妻賣子流離死亡者不可勝計秋七

月代州學正缺員余奉檄署厥事代距馬邑僅三舍公餘過里門見人人菜色啼號之聲不堪聽望家大人出粟減價平糶復煮糜粥碾油糝爲麵日碌碌門頭計口而施饑民填溢里巷爲苟延旦夕之計中秋前五日明府杜又篁父母下車之始目擊心傷憂勞况瘁乃出寰州雜詠八律屬家大人和之復命小子賡次如數蓋悲哀慟苦之音在賢父母不啻監門繪圖而其在編氓則正詩人所云維此哲人謂我劬勞者也鴻雁之鳴固亦情所難已云爾

### 縣治

井田封建迄誰更碁布星羅列戍成走馬空傳訪古蹟飛鴻不度憚邊城十年生聚無多口百里版圖只數丁更是災眚頻告後不堪民物盡巔傾

### 風俗

傾軋相高狙詐紛農桑止業弗知勤釜懸看乏晨炊米樽盡猶涎飲夜醺術弄機關工傀儡謀專嫉妬勝釵裙呼盧鬪棄誰家子試扣底囊沒半文

### 天時

竟歲風霾那日休多寒八月早披裘雁門積雪由腰厚廣武屯雲嶺外浮鴻雁長鳴哀陌上梅花從不放枝頭三春更切農人慮風捲良牟沒處求

每春狂風大作麥種布地者多爲風捲與沙土齊飛

### 丁糧

上曠民稀痼疾疲仁人覩地淚先垂逋逃難向他方索死絕寧堪鬼國追浩浩桑流波

日逝層層雁疊勢空持從頭整頓非容易撫字科仔細推

貧瘠

蔀屋踈籬早閉扉青燐鬼火影依稀幾家能保妻孥樂百室長號老幼饑故土蕭蕭棲  
莫定天涯落落走還非從來不識機絲巧麤布猶艱尺寸衣

誌荒

老少無分色菜如饑來涎沫吐還茹樹皮剝盡庚申歲妻子難存己已餘量減時衡資  
衆餒聊平市值竭吾儲活人自是平生志若道沽名斷不居

避徭

編徭成例幾曾殊漫向旁人問有無卽說朔輕輕有自且如馬重重何圓

朔州古馬邑也所以田畝居室

犬牙相錯朔人有馬產者少而馬人有朔產者乃多然丁徭各有成例亦非莫可究詰者

逃亡現在須分豁土著流移好畫區

前以丁徭不數有欲僉報流民

者不知流民固可東可西之人也土著之地全藉流民租墾傭作若流民畏審而毆之去則地愈荒糧愈累愚民徒自斃耳地方相安之計正須於此處留神

但得一丁着一役雲霓

望慰不難輸

造事

此地非同別地荒年年憂旱稼多傷也知有水可分潤其奈無方坐受殃曲引果能來

吟畔隨流應得度田廠法輪妙轉須賢令寄語馮夷早效康

登雁門關樓

張 濬明經  
邑人

雁峰頂上有高樓萬里長城一望收地設雄關資保障天生奇險作咽喉巖垂青石磨  
人面泉吐白雲鎖馬頭旅雁南來愁過此外驚何得到中州

遊五臺至菩薩頂求大喇嘛談經

霍之璉廩生  
邑人

仰止高峰曳步前玲瓏佛閣碧霄懸一簾化雨甘泉潤萬壑松風清嘖宣始識平橋出  
險渡頓從北地見西天如何正覺銖衣士囊鉢不將我輩傳

次韻李梅崖道臺雁平卽事

霍燦

使節來臨叅大藩轅門鼓角夜爭喧原詩云漏下鼓乃抵郡城仗旄借鎮山河重上計須憐賦役繁

十景清源詩首唱道臺先確清源十景圖詩畫清有三關險隘鎖重垣祇今閭左民疲甚好把霖霖沛濕

原

讀王文端相公復宿山房集有咏頓骨輓二絕能盡物之致余慕而效之因作二

律

前人

煉石焉能去補天化身合作地行仙三台並駕經原野一日週遊遍陌阡彈壓清風來

葭屋循環妙用發新田個中一竅君知否求富何人不執鞭  
推轂登壇胯下翁長驅直欲剪防風青牛合引排前隊白馬無勞執後戎動地聲來雷  
貫耳平原戰罷日方中凱歌此際憑誰奏短笛橫吹有牧童

七夕過廣武

汪

灑侍郎學院  
臨清州人

七夕重經廣武村濃陰此日不堪論山川隔斷雲中雁煙雨瀟騷客裏魂天上有情渡  
河漢人間無夢到關門故鄉漫道并州是惟有雙星識淚痕

再過廣武仍疊前韻

時有和韻者  
亦書壁間

錦鞵依舊解荒村壁上聯吟可共論已媿成名倖豎子且饒佳句慰征魂一官幾度臨  
邊塞雙印新懸過雁門

時奉勅加少宗伯  
銜兼督秦省學政

自是忘家難報國青衫那復染啼痕

敬和前韻二首

霍燦

雁門關外有孤村驛路題詩許共論玉尺裁雲開巨眼冰壺漾月濯清魂文章已足千  
秋賞道法還傳不二門更是星輅經過處龍蛇飛舞壁間痕  
塞北關山老樹村郵亭佳句與誰論文壇亦幟懸週道客夜青藜繞夢魂秦鏡并刀皆

入掌蘇潮韓海悉遊門個中不盡掄才意那許旁人拾唾痕

再次前韻二首時甲申中秋余以假省親夜宿廣武觀報 國忘家之言有感漫

賦

往來僕僕度山村鞅掌風塵那足論自入鱸堂虛歲月每懷雁塞愴神魂萱幃豈少舞  
萊子官舍空張羅雀門此話逢人難共說偷將衫袖掩啼痕

客夢縈迴廣武村匆匆行色不堪論望雲來去雲中雁愛日往還日暮魂兩度談經懸  
絳帳何年獻策謁金門傷心怕對中秋月徹夜橫牕點淚痕

賦贈霍震生學博

蘭陵徐介字翔名士

肯爲卑栖腦俠腸團團苜蓿未全荒欄前春乞花千種硯北晴摹帖幾行人以冰心宜  
淡泊天將冷地着踈狂忘形容我高歌否相覓時寒薛荔裳

讀霍震生雪窗冷嘯有贈

蘭陵陳聶恒字曾起進士

崇官舉舉侍同堂翰墨何人雅擅場經史飽嘗攤腹臥簿書閒笑折腰忙床頭貯酒澆  
愁壘屋角捧蘿補壞墻我愛雪窗清嘯好描摹本地得風光



讀霍氏崇祀月旦錄賦贈

賈董侶甲午舉人  
長子人

世掌絲綸澤故鄉于今桑梓是甘棠綿綿俎豆分廊廡奕奕豐碑勒道旁競羨張公珂  
耀里還誇郭氏笏盈狀青箱錦帙榮青史通德長流萬古芳

前題

趙及長子人  
明經

寰州夫子後先同三世蒸嘗列頻宮豸史憂民勞白簡螭文華國染丹楓澤濡塞外流  
桑水勳著雲中聳雁峯自是名門積德厚儀型百代仰宗宗

前題

曹亮勳長子人  
庠生

從傳博陸起鴻名衣德相高月旦評一路豐碑連北嶽千秋鼎呂重西京流風嘗拂桑  
乾水遺澤還濡廣武城三世蒸嘗知有永欣看謨烈啟簪纓

七言絕句

龍泉寺

元好問

遠渠寒溜夜潺潺說有蛟龍在此間可惜九天霖雨物一泓何事件僧閒

過乃河望尉遲敬德故宅

周于德

戟如攢棘劍如林百戰英雄國士心共事一時投意氣結交原不問黃金

小憩水圍寺四首

湯北京御史

菰蒲深處綠成陰水榭周遭灌木森不信滄洲在紫塞何妨攬轡便抽簪  
水圍孤寺一僧多鏡裏紅塵迴不過唯有幽禽啼白晝間持貝葉坐青莎  
觸暑馳驅亦可憐披襟蘭若水中天何人恨渡桑乾去此日臨流自爽然  
日旰驂駢又撲塵波光迴首意愈親林香冉冉花無主谷響嚶嚶鳥送人

水圍寺

任澄清

水寺湖天一徑通綠陰深處小橋東龍媒已去今何在留得清池對梵宮

前題和韻

霍鏌

盈盈一水四圍通流過寒潭古廟東夜靜禪林明月上恍疑身在水晶宮

青塚吊明妃二首

前人

琵琶彈出漢宮秋青塚千年姓字留多少紅顏承主幸名隨身世盡東流  
娥眉出塞萬家春不數將軍作虎臣但使此身能報國何妨恩寵屬人他

自范歸里途中偶成四首

霍之瑄

一官憔悴七年心兩鬢霜華已半侵  
回首耕桑何日慰長途匹馬自沉吟  
蠲除一切待如何民隱猶存疾痛多  
自顧衰顏已剝落遑爲瘠土起沉疴  
吏隱荒城頗自安壯懷漫爾盡凋殘  
幾年時切逃亡慮回想愈知撫子難  
何事微名羈半生從前長短任衡評  
於今皓首歸來日始知寒酸骨未更

吊張孝廉先生次乃弟導九韻

霍燦

誰過傳經心事違一氈借步未全非  
那知不了青雲志落得孤兒輿襯歸  
一自秋風起盛名公車數上馬蹄輕  
黃金燕市無人問幾度窮荒啜菜羹  
淒涼半席了浮生誰作楚巫吊屈平  
雨字孝廉還故我山埋骨不希榮  
一樹荆花次第開風吹干落不勝哀  
今年八月和風起不見鴻歸自北來

哭田子沛盟兄

張濬

風雨晦明四十年相期白首共歸泉  
而今盟約明明在何故先加祖逖鞭  
孤館挑燈檢大文讀來字字堪傷神  
賈生未見賦成鵬何遽尼山

日日看君病漸顛稜稜瘦骨一絲牽  
妬才造物應難問多少庸人享大年  
生死交情不敢虧傷心難禁淚雙垂  
九泉若赴修文詔應薦人間有舊知

郊行見霍韞齋先生賑荒碑感賦

前人

寰州中翰霍先生出粟曾將活萬民  
留得道旁片石在至今人過動哀聲

寄懷霍震生學博

前人

翩翩公子信陵流宜騁青春賦壯遊  
雞助那堪掛齒後一蹲時對夕陽愁

于章雲學憲賜教送母太夫人南歸詩  
八絕續之感懷家慈因次其韵

霍燦

每思愛日晦從前金倒青毡二十年  
幾度求歸歸未得徒勞眼望白雲邊

清白家傳兩袖風雁門回首日飛鴻  
邇來病骨支離甚

己卯秋試之便得一省問別後抵署病大作家報中不敢與聞隻字

不敢

郵書誤入筒

五十漫云強仕時不堪千里隔慈幃  
劬勞欲報何能報刻刻傷心是別離

眉峰愁鎖猝難開倏又三年歇舞萊

余前鐸長子十年戊寅復補其地計今庚辰冬又三年矣

遊子豈真戀雞助青雲壯

志久成灰

茱萸飲後憶重陽枉自悲思數雁行  
首蓓啖殘滋味少何如菽水侍萱堂  
淒風四壁苦難堪貧病交攻強自寬  
檢點底囊空若洗但憑一緘報平安  
瑤篇讀罷感情深除却毛離孰我親  
莊誦幾週雙淚下從來孝子是仁人  
牢騷滿腹懶饗餐豈是官寒不耐寒  
一自先君捐棄後人問何事更相干

康熙庚辰冬潞郡送試回甫二日坤兒同阿倩來視得知家母安好感賦八絕仍用

于宗師原韻

皓髮蒼顏不似前支離病骨復經年  
冷曹更有何人至日日音書盼北邊  
並轡連驪渡曉風省將消息問征鴻  
欲知近日官衙况濁一瓢詩一筒  
莫道來逢試畢時門生尙隔絳紗幃  
關情幸有吾身在好把清罇叙別離  
悶填胸臆撥難開冷淡生涯似草萊  
豈是青毡故戀戀羞將門祚冷成灰  
病餘茫不辨陰陽獨有思親淚幾行  
汝輩遠來因慰我我今何以慰萱堂  
抱膝呻吟苦不堪病瘦損覺衣寬  
夜來說盡家常話但得親安子亦安

半生兒女繫情深携手同來倍覺親其若旅囊羞澁甚滿船明月待歸人  
日來病起勉加餐可奈毡寒歲又寒苜蓿不堪分贈汝空勞車馬到漳干

五言古

水圍寺懷古次張孝廉韻

霍之瑄

蟾光映碧波煙籠梵宮瓦瑩瑩冰壺裏虛空法雨洒偶來證禪心野蔓纏足踝遙望水  
中央竚立長足下蒼蒼白露寒浮沈任牛馬色相本來空迷津問真假剩有心月心銀  
河天際灑望洋增浩嘆千古推大雅

讀蘭陵徐翔念先生晉陽紀事詩有懷陳曾起進士爲次其韻

霍燦

焚香誦佳製珠璣於此萃娓娓數百言文章兼道義其情渾以深其辭婉而至自非個  
中人安識作者意如何井底蛙輕量凌雲勢祇今多富豪軒昂據高位豈知大塊中同  
一蜉蝣寄空谷少足音吾黨容魑魅慘恣雌黃口寧解金蘭契小子實不才繩尺欽大  
吏從公聞政餘教言謹書記邂逅陳先生希聲追太始傾蓋便成懽肝膈可勿諱憐我  
雪窗吟不以盲人視別去神愴然良晤何時繼

晉陽紀事翔念先生與珂里諸公爲艾圃陶刺中賦也刺史制藝房刻爲今上所賞識癸未 駕幸晉陽面加獎許再用前韵賦之今古稱儒者何人拔乎萃要從六籍中辨白得精義名可千秋賞功非一蹴至鏡花而水月一一有真意何必長江形何必短兵勢妙在怯合間布置若故位紫陽不我欺衣鉢早傳寄牛鬼與蛇神青天遭蠱魅徒爾駭聽聞寧知遠書契士淫出盲師民疲思循吏但得頂門針勝讀諸傳記祇今聖天子經義崇正始名手朕知之大夫爾勿諱艾圃有藏藁莫作等閒視五祖六祖後傳燈此其繼

讀霍氏三世崇祀月旦錄賦贈

賈璠升

副榜貢  
長子人

盱衡職方圖雲中稱名隩桑乾匯其南恒嶽峙其北孕毓有高賢霍氏尤聞族家傳書軸香鴻文如綺縠鳳翮起翩翩繼世乘華縠豈直霖寰區而且周比屋偉業與深仁未易數更僕見者爲塗歌思者爲巷哭崇祀聖賢林伐石鐫芳躅君不見子孟勛名封博陸開國承家貽謀淑祖武孫繩數百年惠風常拂天池淥雲山何蒼蒼流水何復復我懷三先生山水連雲曲

五言排

毒某邑侯

霍燾

下里求仙令雲霓慰遠陬精明兼渾厚儒雅更風流業以千秋著胸將六合收江南魯  
放鶴塞北偶潛虻棠樹虎丘岸留見雁岫頭下車問疾苦先務急田疇惟此彈丸地痛  
羅水旱憂逼真剜肉痛復奈羽書稠調劑勞仁者係和藉令謀煩苛政悉蠲盤錯刃徐  
遊欲起溝中瘠不教水面浮經營多慘淡顧復苦綢繆早祈天心順竚覩民疾廖至如  
弟子輦以及縉紳儔期許行誼網過從禮數優鴻砲隆覆載大化侔薪醮堂厦生光彩  
衣冠供獻酬媿余蒙睇睇鮮克益諮諏此日逢申誕臨風導野謳祇將修爵牟詎敢側  
珠琳但願昇平會長溪海屋籌

渡涇嶺詩

唐武元衡飛

又過雁門北不勝南客悲三邊巖上見雙淚望鄉垂暮角風中戍殘陽天際旗更看晉  
自羽胡馬在封陲

五言律



與雨山李君白登回承鹿坪

郭君召約觀金龍池

申維岱太僕卿

道出龍池近還約鵝序  
睽金龍化已久池水尙堪憐  
縱是沙爲岸不爲風所孽  
隆冬涵暖氣朝日散清煙

潤藉桑乾遠澍徹霄漢  
連濯纓慙我鬢把釣奈塵緣  
携取橘中意悠懷泌什篇  
徘徊歸次晚候炬滿前川

水圍寺

潘榛主事

移蓋池亭下悠然興自生  
水清方照物山遠不知名  
蒲柳羣相向魚鳶各有情  
留連迷去諸誰謂是邊城

遊金龍池

汪承爵

莽莽萬山秋靈池景物幽  
氣蒸林薄潭泉迸翠光  
流水闊天浮寺沙明月  
印舟龍媒嗟已去陳迹到今留

謁鄂祠禱雨

郭顯忠

聞過龍池久褰裳此日行荒邊陳迹少古廟一僧清水遶斜通寺山遙曲向城願公降  
龍羊霖雨濟蒼生

遊沙家壩僧舍

霍鏌

雲房依古廟岑寂證禪心杲日當階麗清風入座深墻低聯蔓草野闊散疎林坐久渾  
忘世紅塵不許侵

盧靖親家過訪別墅

前人

病久常疎客春來見友生敲棋酣小酌剪燭話深更蝶夢空中幻鶯鳴分外清還期軒  
冕日記取訂鷗盟

春日園林獨酌

前人

東風吹樂意散作滿園春飛躍還高下住來盡主賓紅藏桃葉媚綠上柳條新剩有尋  
芳地停盃憶故人

和任明府北上道中

前人

歲暮時芳臘匆匆馬首東寒颺吹雪霽曉日襯霞紅仗策心猶壯連茹事已空憂時渾

如醉孤劍付長風

讀賈浮戈道長疏

前人

國事人臣責藩籬未可分丰標千仞峻議論百年芬有意扶元氣還期渙小群名賢歸  
啟事我亦慶風雲

謁鄂祠

蔚州魏象樞

邢部尚書

有到金龍上池深不見龍青山回曲岸怪樹啟高墉水隔漁村夢花延佛巷供鄂公遺  
迹且誰遺白雲封

青塚

霍之瑄

當年爲國死今日草猶生不謂別離苦何憐兒女情邊風鼓氣節塞月映忠精絕代徒  
誇色却麟閣榮

廣武懷古

驛道視風作

霍煜

廩生邑人

臨邊吊古蹟惆悵幽懷中荒服仍周甸深山尙禹功烽埃迤迳立嚴穴蜿蜒通國土何  
寥寥徒然仰大風

讀霍太老師崇祀錄有贈

鮑 獲 長子人  
明經

閱閱雲西重名門世澤長南宮欣接武北闕榮封黃忠孝傳家國慈仁溢梓桑千秋崇  
祀典俎豆藉生光

前題

賈珏升 長子人  
庠生

從祀高賢有如公三世無傳家惟琬琰樹德在粉楡類壁蒸嘗永鄉評月日孚一編重  
國史千載仰訃謨

五言絕

霍 鎮

林居漫詠十首

觸景隨成句詩成旋已忘非關情緒懶吾意在羲皇

其二

冬夜樓居寂霜空飛鳥鳴呼童人所自道是天鵝聲

其三

一自林居下樓遲合自然人皆苦寂寞我獨愛清閒

其四

出門何所適信步到前溪魚鳥皆同調何妨識者希

其五

撥悶書爲伴消愁酒是鋤邇來愁悶化餘却酒和書

其六

逸樂萬緣生憂危百感淨病雖苦我身我亦全於病

其七

紅杏惹遊蜂紛紛鬧停午胡床時徙倚獨坐懷千古

其八

泉飛落曲岸映月作金波觸處皆成趣塵囂奈若何

其九

百派爭流急橋成一水收長虹貫白日靈氣繞滄州

其十

古木寒煙鎖流波漾日明渡頭人競涉疑在畫圖行

秋日即事有序

霍之瑄邑人

龍池水圍寺神頭古蹟昔吾邑選勝行樂地也宦海沉幾三十年久不識寒山面目丁卯秋八月偶携同人再訂鷗盟山水依稀風景頓別為之徘徊水際駐馬山頭秋色撩人輒不禁滿目蕭瑟之感乘興而往興盡而返豈其星移物換老而興悲抑亦生齒消耗物力斯絀滄桑之變能無慨然漫成口號數絕聊以彷彿當年之勝云

鄂公祠

廟貌渾如昨英風自萬古姓名標史冊遺像於茲覩  
鞭掃煙氛淨拳揮鐵鉞耳昔時唐社稷今日此龍潭  
擇主知天命糟糠豈自忘丈夫感義氣冰節凜秋霜  
功成身已退一曲清商老臺館依池畔皎皎明月好

龍馬

百戰勛名名盛奔馳汗馬邊風吹雁塞池水躍龍濤  
每民毓靈久飛騰逐電光千年神變化駿骨死猶香

水圍寺

藻蘋縈水面野鳥浴波明四望澄清色如同瀛海行  
百泓週四際一寺獨巍然月湧金波動乘槎欲問天

### 黃道泉

雪浪排空際翻從山底過倦依岩石立風送濤聲多  
泉源渾不竭滔滔萬古秋海鷗時上下洗耳固滄洲

### 聖水堂

按此堂朔州刺史辛公良器所建仕水涯山  
足之間時康熙丁未年也今亦廢止存石基

水澌石有聲石激水成波萬斛珠璣湧荆山韞玉多  
一潭千頃碧百畝稻稅香灌溉資神力因名聖水堂

### 神婆古蹟

百泉轟地軸萬壑響松風驚起神婆睡携兒奔石硤  
倒瀉銀河浪恕將頑石鎔至今小憩處手足尙留縱

### 洪濤山

翠嶺聳乾象崔嵬兩埠開清流挹左右俯觀盡塵埃

洪水何年息千山列翠屏川原盡一望足下起雷霆

三大王廟

封號加元代儲精自魏宮磨蘚讀古碣千載仰雄風  
雲瑣千峰暗雷轟百里驚神工侔造化澍雨滋群生

司馬泊崔丞相宅石獅

躍潛池裏馬興廢門前獅龍馬歸何處石獅蹄未移  
司馬聲名重崑山雙璧輝遺址豐草沒故里尙依稀

閒居

味淡神徐定心閒體日和杞憂早已釋誰復問絃歌

寒松

勁質千霄漢風霜老瘦枝歲寒仍舊態落落少人知

目鴻

鴻飛何所適飲喙且隨宜莫作樊籠鳥自驚而自疑

前人

前人

前人



步月

前人

浩浩天中月光披萬里雲塵埃空碧落佳氣淨氤氳

詞

賀新郎

已卯科試得以便假歸省家慈有作

霍璽

文是槐黃矣見多少車如行雲馬若流水三年鐵硯磨穿盡入穀英雄有幾聽天外秋雁長啼試問先生可甚事也策蹇踉蹌來到此櫛淒風冰苦雨爲因有母在堂耳目凝眸青山一帶白雲千里那管黑貂裘敝否忙呼二三奴子擔琴書半肩行李打點入門去獻壽家慈壽辰在七月廿六日舊來衣檢出殘篋裏率兒孫齊舞起

江月晃重山前題

前人

黃土坡前道路雁門關上欄杆問君何事促歸鞍倦飛鳥那日不思還老母倚門盼望妻兒兩下悲酸桑乾總煖苴蓂寒歸來看是否舊容顏

帝臺春感遇漫賦

前人

生長塞北鬚眉空如戟無翼冲風浪逐時流苟求雞肋憶昔英年慷慨侶那肯戀半氈

微職到今來白髮如銀傷心駒隙 呼將伯誰藉力喬相識漫相覓並無甚相干枉勞  
人目斷雁雲秋碧老則而今已老了休則怎生便休得又還聽黃鸝別尋春消息

沁園春

壬午秋闈阻雨兼植鹽臬李奎  
俊之亂久不得行感而有作

前人

屈指旬餘不住簾幃亂灑如篩把書歎悶倒鶉衣濕透閒官愁損雞骨難支是若釀災  
伊誰作孽惹得先生撚斷髭這公案合先征風伯後討雨師 窮追問彼何辭怎仁愛  
天心弗體之况萬民仰命一朝肆虐九秋待熟百畝俄萎思扣重閤奈羞綿力搔首徒  
傷曼倩饑何暇及又憂心草竊蒿日瘡痍

其二

海怪山精覆雨翻雲粧點秋聲恨連宵不斷敲殘客夢經旬無歇攪碎離情滿腔幽思  
百端窮狀種種催人上愁城更難處是一肩行李千里途程 有誰賜顧先生問脂爾  
東兮何日行贈黃驪十乘揚鞭疾走青蚨萬貫扶翼遄征

周黨嚴光論

明湯賓戶

漢光武應赤苻起春陵不數載而噓炎劉之燼甫膺大寶下明詔安車立纁徵周黨嚴光詣關親屈萬乘以禮下之論者謂兩處士裘釣賤客耕野鄙人身處窮巷阨閭未談金版赤韜之略未見斬將搃旗之勞未樹攻城拓地之績條加以徵聘惠以寵光使榮華殿陛立名當世豈被褐懷寶者也抑以什巾襲燕都者耶噫此光武所爲提綱挈領首觸大計而藉此兩人磨礪一世之氣節而培植千百年之命脈也蓋上表也下影也表正則影隨聲出則響應上鼓則下答不爽錙銖也故人心何常聽上甄陶耳風俗何常聽上轉移耳西漢不愛高爵厚祿以薊羶豪傑故士旨驚尊顯而委蛇變化陰陽人主以保寵榮甚且僞符命誦功德羽翼梟獍而不羞波流風靡罔克樹立不振刷挽回之安所底止光武懼焉謂國家隆替其窾繁屬世風而世風汙隆其樞鍵又屬上人所好尙徒整飭頽靡而漫無所旌異徒晉陳功見能輩與剖符析圭則天下亦僅僅爭成功見能以効知遇而欲砥礪名節蟬翼富貴者道何由爲是下蒲輪之聘搜岩穴之老降黃屋之尊禮不賓之士朝耕釣於草澤夕坐論於廊扉且椅衡門而棲遲暮揖天子

而抗志豈獨隆此兩處士哉又豈直以恩渥而私厚一布衣哉將使都人士之待下風者懼然艷心蹶然企踵瞿然不式而顧化將恬退之操而鳧趨蠅逐者捫心退矣顯修姱之行而蒲伏者將屈首下矣褒高節獨行之士而俛仰遷移如脂如韋者將改絃易轍以向上意旨矣竽先而衆樂和表直而衆足趨誠倡之也故竟東漢朝罔不希光驚影龍其香儀其羽倚道藝以就其聲價者纍纍起世不貴結綬金馬之庭而貴側名道義之儔不畏王朝鉗灼之憲綱而畏高賢月旦之清議迨其季世雖幼主握鬯巨奸綰樞而左窺右覘不敢竊移神器談者謂一絲垂九鼎則烈士扶持之功而光武褒嘉節義之明效也第其重名之過不中扁王良應對而姍於東海友人樊英就聘而壺山蒙其恥聲士率競激以博名高而顧厨俊及標榜成風文網以讓黨錮之禍千載於邑其始未嘗不匡世正俗而後陵夷衰微也噫士期自振拔耳商俗靡靡而伯夷之節不改晉室清談而卞壺之忠目樹詎卑論儕俗與世浮沉必待上之鼓舞而後輾然思奮哉至若身際熙朝又不足拘守局曲避地獨竄彼無軌翼當世之實而長貧賤驕語富貴者又兩處士之羞也

邊民丁銀煩重疏

田喜霖

爲敬陳邊民丁銀煩重之苦懇賜除豁以救殘黎事臣惟天下大勢邊方與腹裏不同蓋以土地有肥瘠戶口有多寡故也臣晉人也卽以晉之邊方言之大同一府勢處極邊砂磧瀰漫土薄民稀順治六年間姜壤變亂百姓殺戮死傷者十之七八後於康熙二三年連值水旱或凍餓溝壑或鬻賣他鄉者又復不可勝數所有見存遺黎悉我皇上特發帑金遣官救活之貧民也其不可與腹裏地方並論明矣乃有邊方更苦於復裏者如丁銀煩重一事是也臣查各直省丁銀定例少者五分八分多者亦不過一錢二錢而止而大同一府有一丁每歲徵銀有一兩者有徵銀二兩者甚有三兩四兩者其故蓋由於兵荒之後殺戮逃亡者衆地方諸臣皆從國計起見不敢缺損原額其以一丁而包賠數丁之銀者累年於茲矣臣愚以爲長此不變不但不能代人賠納竊恐代人賠納之民勢必逃亡不盡不止臣係本府屬縣之人聞見最真敢祈皇上勅下督撫卽確查大同一府州縣衛所見在人丁若干俱照各直省則例按丁徵銀其有殺傷逃亡之丁令見在人包賠者立賜除豁勿得因循原額以增民困並祈行查各府州

縣有本丁逃亡而令見丁賠納者奏請除豁庶皇上發帑遣官救活之窮民得以安生樂業矣伏祈睿鑒施行

修聖廟小引

邑人霍百齡

文廟之崇祀吾 夫子也整齊殿廡輪奐宮牆豈徒肅廟貌壯觀瞻已哉列以尼山日月爲萬年起化之宗泮水藻芹實百代修文之地故搢紳皆子弟之列得入其門爵祿悉

先師之遺均霑其澤飲德教而思本原忍令風雨漂搖鞠爲茂草乎寰邑 聖人廟

經同治十年大雨後正殿旣已參漏圍牆亦復傾頽不第五代祠大成門之剝落名宦祠鄉賢祠之摧殘已也道旁見百官之富景仰無數仞之高豈聖朝褒德佑文之意士子尊師重道之心哉而且有關文教尤莫如魁星神其樓閣摧殘神像不整不緣此革故鼎新亦無以限靈爽式憑也都人士日擊心悲因於甲申之春稟命於賢宰妖天捐貲於閭邑士庶糾工卜吉揀匠庀材凡牆垣剝蝕者悉易以磚而質取其堅是棟宇欹斜者卽更其木而像歸於正瓦防其墮大殿之前後貫

以釘壁慮其危花牆之東西鋪以石惜彫零多歷年所事不易於重新且饑饉適值薦臻錢更難於猝辦因之募化不上兩千金延緩已經五六載丹楹不果殊難免因陋就簡之譏紛壁全更差少慰啟後承先之願風光暫改異前日一味荒涼歲月頻遷望後人勤加補綴如常此欽崇學校自爾僻壤生才若猶是藐視斯文安望瀛洲可步芳徽欲繼令緒常留願後之思木鐸而興懷聆金聲而有志者亦將有感於斯云

文昌帝君籤詩序

清乾隆年

田天祚允錫

從來得失本有定數禍福由人自招苟能循理守分則物來順應明若觀火又何疑之未決自世人不安義命每每臨事妄爲一心自無主宰故聖人著爲卜筮之法以示趨避之路籤詞者卽卜筮之遺意而假神道以設教者也攷之關帝觀音諸神廟俱有刊本籤詩行世惟文帝前向無傳本因於間窗薰沐敬集成句百首衍以釋語聊以廣帝君牖民覺世之盛心夫帝君孝友神也其所著陰騭文一篇及化書所紀無非誠人敦倫飭行作善修身之法世之人果能身體力行於平日而臨事不決以誠意叩之無不

應如桴鼓所謂至誠之道可以前知於理幸毋以卜筮求之也

重修櫓台廟碑記明正德年

邑人陸宗

馬邑城兌地有古蹟名曰櫓台稽之邑志故老咸曰是台乃唐時李衛公靖爲觀星所築也然其形勢崔嵬凡往過來續之客靡不登臨眺望駐意吟賞其奇異秀麗誠爲八景之一然創於秦仍於歷代以至我朝世之相去迨千有餘年居址尙未奔懷台上素有玄天上帝廟廟東西向福善禍淫一邑敬奉先建正殿三間山門三間然而營造規模何其卑且陋也元至正年間本城鎮守使谷公琳又重建之弘治年間鎮撫袁公增建兩廊各三間內繪武當山修行功德右之新創今樓一座與左之舊鍾樓相接應巍然煥然耿耿在人耳目其規模卑陋者若徑庭矣但其歲久險隘難行有善士劉某化歛四方貲財鳩工聚石以砌其路經始於正德己卯季秋落成于庚辰之仲夏由合而完由完而美將見仰宮墻而棟宇飛翬覩神像而威儀正肅昔之未修者今其修向之不備者今其備事成而弗刻稽一石何以彰衆人敬神祈福好善樂施之美意哉若夫台之詳因事之始末又余所未識也姑一書此以狀衆人之情是爲記



重修櫓臺碑記

田天祚

天下事固藉前人之經始尤賴後人之觀成故創守兼重而作述同功邑之有櫓台其來已久莫稽創建之年或傳爲唐季衛公觀星台雖荒言無徵然衛公以王佑之才輔唐開國其學究天文觀星有台或不盡誣况台居雉城之西高逾女牆城中閭閻境內山川悠然在日文人騷客往往選勝登臨爲色巨觀且廟祀玄武樓居文帝揆文奮武實關邑人振興之地緣年久傾圯棟宇不完歲邑人士咸商所以維新之奈工費巨而民力絀經營于年 月落成于年 月閱歲兩載需金二百葺頽垣補蹊道新神儀飾廟貌以奎斗之宜近文峯也移其像于城東小樓而奉梓潼於紫極之閣以財神之宜就西方金位也改二聖祠而爲增福之堂建朱衣之閣以佑科名理住僧之寮以永香火入其境而規制宏廠煥然改觀庶前人之勝跡不泯邑中之名地常存後人不可謂無功也司其事者爲副榜田埏里民 等不避風雨不辭勞怨又安可不勒諸貞珉以誌勸

新城隍廟記

馬邑古襄遺址舊有城隍廟建于洪武八年亘八十尺計其修則十有三丈也初爲正殿者三繼爲寢廟者一廊廡者六門楣者三一六三皆間之數序其所作雖先後異時畢竟成一大盛事蓋神之正者非淫祀也第歲久垣頽礎爛僅蔽風雨在神固無損益而識者瞻之抑孰堪其破壞若此哉歲甲申夏邑之耆官各捐已儲召工匠繚以垣闕者補之靡者創之舊者新之整頽易爛煥若始事工將竣無虛子乃與衆謀曰茲可紀諸石矣遂伐石而以記屬余余謂城隍廟古莫詳事始說者謂既有社矣不應復有城隍故唐李冰陽謂祀典無之惟吳越有爾李白作韋鄂州碑謂大小滅郭抗詞正色言於城隍厥應如響杜牧爲黃州刺史有祭城隍神祈雨文二首如韓文公之于潮麴信陵之于舒皆有祭文而許遠亦有咎并鸞翔危堞神護之語不獨吳越爲然蕪湖城隍祠建于赤烏二年高齊慕容儼梁武陵王祀城隍神皆書于史則又不獨唐而已開成中睦州刺史呂述以爲合於祀之八蠟祭防與水庸者以正義考之事殊不類今其祀幾遍天下國初詔祀亦遍之各有文載諸石可稽或賜廟額成放封爵郡異而縣不同雖有唐虞三代之舊要亦故典蓋神之正者非淫祀也嗣是而後或爲國祝釐或爲民

祈福又安知嚮應不如李白所言哉孔子曰非其鬼而祭之陷也正如此余學孔子者不敢以崛奇荒怪之語詒諸話言 以其正而可記者言之爲記

創建霍家莊河神廟碑銘并序

崇禎年

巡按御史霍

鏗本邑人

縣西七里許爲霍家莊莊無霍姓者或上世徙居他所或徙城中卽余姓氏然皆不可考矣莊北可一里爲豐臺崖崖下有金水河河水一自西北來其源爲三泉爲金龍池爲七星海一自西南來其源爲細蘆灣或曰戲龍彎於今建神廟之西轉折而北又折而東則有水復自西北來其源爲臘河口一爲玉泉或曰黃道泉與河水匯於今築別墅之北兼總衆流而南則所謂桑乾河也歲壬戌余考選監察御史請假歸里暇日遊水圍寺道經於此縱日流覽雷山當面衆流滌迴塞上滄洲於茲爲勝於是始卜築焉東偏一區三面倚崗一面臨水有樹扶疏有泉湧出乃建別業園周圍畝五十有庭有齋有樓高五丈因水爲亭因樹爲榭循崖而北居中一區下爲河波流湍激乃建水碾水磨覆以瓦其楹七用水不及半強半從開口北注濟騰淬泮蒲柳魚鳥菁葱游泳其間上爲原平垣高曠乃建油房貯梁十二倚崖面水建樓楹凡三建門樓周有圍廊中

繪聖像建民居聚處家數十布置乃定乃合輿人之情謂茲靈秀河實發祥且始安流  
順軌底奠一隅微神力不及此崇德報功事烏可無廟於是西偏一區厥土剛燥隆隆  
高起西望諸水發源之處歷可數也登眺稱快曰神其歆是乎遂鳩工庀才建廟三楹  
簷廊稱是肖像其內金碧輝煌旁建雲房三間居黃冠以奉香火鑄鐘一以司晨昏歲  
時祭享人煙雜沓鼓樂喧闐居盡寰州以西一大聚落矣落成之日適余自巡按甘肅  
歸休沐二年復得徙客葺補其未備戊辰之夏道士郝大海謂廟無記曷以示來茲請  
爲嗣後豎不朽余爲河之有神此從來矣方輿有四瀆河居一焉記稱五神河伯與四  
帝並不纂重乎或謂發崑崙導積石九曲放乎海塞上盈盈水恐未足以當之余曰唯  
唯否否天一生水同此氣化一勺不測不作殊觀分之川流合之敦化是一而已安在  
盈盈水不與稱四瀆並五神者共此河伯也與哉因是而有感於斯倏而郊圻倏而廟  
貌倏而獸蹄鳥跡倏而犬吠雞鳴滄海桑田良非虛語古人勒碣高深以候遷變有以  
也繼此日禦災捍患盼蠻明禋神非人不依人非神莫茈且爲靈境且爲樂土相與垂  
千百世勿替將使後之人謂霍氏實創建自今日始無若前者之不可考也乃命工鑿

諸石而銘之曰 靄山奕奕洪濤列峙靄水洋洋桑乾委迤鍾靈孕秀萃於西鄙衆派環流抱此礧礧巍巍神廟負崗面水天津是令地肺斯通底奠黎庶樂利靡窮聖皇御極德格蒼窮天人效順澤被昆蟲雲山縹緲野水空濛千秋百世永賴神功

重修三大王廟碑金天會十三年

知縣程舜卿

神之祀立乎山之下自古有泉不絕水滂不爲盈溢旱嘆不爲竭涸名桑乾河源舊石刻云神名拓跋廟號桑乾所書不叙本末詢之縣民有曰故老相傳有三王謂之兄弟三人母卽拓跋公主或曰飲是泉而誕三王次者能伏桑乾之龍而舊廟像尙有龍俯伏之狀存焉又於廟四壁繪畫母子儀像所傳數百年不絕神之本末大畧可知山西河之大者莫如桑乾朔郡之地百里有天池其清流無底有人乘車池側忽遇大風飄墮後獲車輪於桑乾泉魏文帝以金珠穿七魚放之池濱復於桑乾泉夕得所穿之魚又以金縷箭射池之巨鱗亦于桑乾河得所射之箭天池廟碑具載其事開皇間有碑曰密與桑乾河潛通竊維河之靈迹廣大深渺宜乎神詞自古以來重修由唐之遼民咸祈禱焉保大間兵火作廟貌毀廢郡有故事春秋禱祀桑乾居其上州遣官僚與

縣令佐同詣故基邑民咸與薦享金天會十三年縣令程舜卿與邑佐趙鉉祈禱歎其  
基址荒榛廟儀未立方勸諭鄉民致力復建時則節度使耶律金吾下車之初知此靈  
迹銳意興崇聞者咸悅于是縣境百姓欣然迪從殫力獻工金幣足而用度不匱材木  
備而梁棟完整至瓦石丹雘無不充好其所塑神像亦皆依古法而基構布列稍加于  
舊攷之石刻乃大遼應曆五祀觀其崇修年月乃肇于甲寅成于乙卯以甲子推之應  
曆乙卯至今乙卯一百八十餘年當時重建既以甲寅乙卯今之重建復以甲寅乙卯  
應曆乙卯閏季秋天會乙卯閏孟冬豈非廢興有數成壞有時人之所爲特係乎時數  
耳然則神隱顯豈復有累於歲月姑志於石使人知神之靈而當致其欽崇也廟貌旣  
復立烏可不紀其歲月

元封三大王廟碑記銘

大德三年封桑乾河神顯應茂濟王廟 碑文未鈔銘曰銘曰桑乾之水雄朔方七輪派出  
雷山陽東會衆流挾太行襟帶燕薊達海洋命書天詔誰將米章公或師葆光師今羽  
化仙云已宜配廟食如庚桑玉京盤鑑壯金湯聖元寶祚垂無疆

拓跋三大王辨

邑人霍殿鰲

馬邑三大王廟有遼金元明四代碑遼碑云神名拓跋廟號桑乾雖不叙其始末而大義已明金碑云詢之故老有三王謂之兄弟三人毋卽拓跋公主又云或曰公主飲是泉而生三王次者能伏桑乾之龍又曰宜乎自古以來祠廟重修由唐之遼凡有水旱民咸祈禱焉元明碑直云公主飲池水而生三神能興雲致雨遼封爲神愈矢愈遠自金天會神被其誣者百餘年是烏可以不辨魏自中葉以後更姓元不稱拓跋神名拓跋必魏有功之始祖尊而爲神卽三王非公主也果公主生三王則三王非魏子孫矣以異姓而王必先有功于魏何以北魏史冊無異姓封王是拓跋氏三王非公主子三王明矣北魏當東晉時文中子稱爲文教之邦斷無母子同姓之理是魏已封王不自元始封王曰公主飲池水而生神猶狄生契姜嫄生棄之美談無足怪也所怪者三神生而得公主遺體三神亦人耳何無幼名冠字三神生而果飛在天也潛于淵也何今之遺像有面赤面白面黑之分三神稟性靈爽何無分之以職授之以事如棄爲后稷契爲司徒且公主係可汗女天潢貴胄有子聖神史何難揚厲鋪張紀其

時代如周有八士殷有三仁以彰興朝之盛而反令公主寂漠無聞乎不然誰氏之女能稱公主乎至飲水生神之說不敢謂世無其事但憑或曰以爲信直無稽之談當付

之齊東野語而已然則三王之稱果何以徵信于後世哉案通鑑鮮卑索頭部世居北

荒自可汗毛統國三十六十三世可汗鄰生詰汾詰汾與天女遇而生力微北史云有詰

微無舅翁之謠公主生神之附會必始于此晋惠帝元康元年索頭部名祿官者分其部爲二

與兄子猗迤音陀猗盧分統之懷帝封猗盧爲代公與以陁北之地雁門關山馬邑在其中

愍帝進封猗盧爵爲王此封王之始合三部面爲三曰三王猗迤猗盧兄弟二人合祿

官叔侄三爲聖武人誤以爲兄弟三人也至拓跋珪改國號魏卽皇帝位都平城謚詰

汾帝謚祿官爲桓帝謚猗迤爲昭帝謚猗盧爲穆帝三王肇基王迹必郊祀以配天馬

邑爲發祥之地又平城近畿宜必立廟廟必在桑乾者猗盧嘗築城于桑乾之陽常爽

又設館于温水之右生平所理神所戀也金曰伏桑乾之龍元曰爲桑乾河神蓋有功

于生前者必顯靈于身後曰由唐之遼民咸祈禱是必能捍大災禦大患順雨調風謂

爲桑乾之龍也可謂爲桑乾河神也可是唐以爲神神不至遼封而元明人以爲遼封



者東魏傳高齊西魏傳宇文周二氏皆由篡弒得國勝國典型翦除淨盡其人其事不在人口傳耳熟聞者由後周以迄遼四百餘年矣遼與魏同出鮮卑平城亦遼之西京八地相親見元魏功業之不可泯也於是勒石於廟中而紀之曰神名拓跋廟號桑乾使前王姓氏常在人間是修廟非封神也元封大王大其功也知神爲拓跋氏不知神爲祿官爲猗迤爲猗盧先謚帝號矣使知神已封帝必於帝之上更加徽號焉何必加封廣濟普濟洪濟之號哉元碑又云洪濟未封之先有龍震帝闕討封之說極寫神之靈應而不覺其詞之荒唐矣明初山西巡撫張某以爲淫祀革官祭旱疫三年詔復其舊前清因之至於民國未替三大王之說附會失實已久故余爲之辨

重修鹿峯山白雲寺碑記

朔州進士姚師錫

恒嶽之南雁關以北有數峯綿互其間峯峯接連俱占勝概而鹿峯尤據諸峯之勝中有古寺號曰白雲向北面 佛殿三間 十王殿間三東 關帝 觀音 龍母殿三間口中鐘樓禪室俱備寺外兼圖 山神土地曆康熙乾隆兩次重修建造未詳憶創修之始或以地僻人稀之境不可無梵宇以爲往來之應與抑以雲山縹渺等於間曠

必有神祠以肅觀使人無往不生其敬畏與特歷年已久漸就傾圮爲可惜耳夫事之肇造在數百以前者卽一邱一壑片屋數椽苟有所關皆不可廢况茲山與雁關相表裏而寺以白雲名又於煙霞浩邈之地爲諸神靈爽所式憑顧可任其頽而不爲之所也爰是峯之環列左右者於道光辛丑年公議重修鳩工庀材始於三月初六落成於五月十三殿宇神像俱較美備莊嚴外又新設龍王四位斯誠可以繼創修之志而足生後人之慕效於無已矣抑人更有取焉山各有主主各有屬或謂是山隸於代郡修之者宜惟代人乃合朔州馬邑代郡之人而共襄厥事斯固山之名勝足繫人思抑非托諸神呵護之靈不足感人敬畏之心亦安能使遠近居民羣焉竭貲而成功於勿替哉至於喬木參天清泉濬地凡與寺迴合映帶者每足供人清口而修之者之意不在此卽余所取而記之者亦不贅及也是爲記

重修明倫堂 訓導推陞猗氏縣教諭吳觀亨戊子舉人

教諭吳觀亨戊子舉人謹將修明堂捐資姓名並前署訓導馬振海壬午舉人重修敬一亭院宅捐貲姓名開列榜示以彰樂施至捐簿已登捐貲未付本學已經如數佃出

未敢並列其名者以昭核實開工在癸未之秋其落成在甲申之春而其勒書碑記乃在戊子之秋者非敢緩也俟收捐也其不能再緩者本學行將有日不可有始而無終也其紀修堂而並及前任馬事者帳簿既存不忍徒終一己之事而不終前任未終之事者其先紀修堂人名而後及前事者明倫堂乃學校所最重也事終一堂大門兩闔雖就甃石灰雖存若干而東西齋房工未修者鶴俸甚微無力再佃後之緩緩有力而司鐸於茲者其好善之心雖不如我安在不能終我之未終也是爲記

重修文筆峰小引光緒十五年

邑訓導楊 鵬崑嵐人

天下事有似可緩而實宜急者文風是也文風之聚散地方之盛衰因焉馬邑桑乾河發源於境內由西北包城蜿蜒而東所謂玉帶環抱者非歟惟水性就下去處缺少關欄前明大令宋公子質素精堪輿乃於巽方水口因土堆高處作文明塔銳其頂爲筆形指河爲硯池以鎮之其後人物豐繁士氣亦蒸蒸日上者殆百餘年如田霍二氏尤其照彰較著者邑候秦公擴補葺之迄今歲久年湮筆形頽剝鄉耆老議復新之霍生殿驚以告余余不敏暫權斯鐸雖未能振起膠庠然冀幸之私常介介焉夫地理之有

風水猶人身之有血脈血脈過洩形容爲之枯槁然則文明塔之重修其當今之急務乎特鄉城寥寂籌款無從孤掌難鳴衆擎易舉所願凡我同學及紳耆舊家工賈農商有志科名者概出囊貲助成功於不日俾山川靈秀之氣應筆而來明秋瞬屬鄉場賢書報捷不特首事者之幸亦樂善好施者之光也區區之心竊有厚望焉

修關帝馬王廟記

邑人霍百齡

敬神莫先乎修祠宇也寰邑東甕城建關帝廟三楹東西廊各二間鐘樓一座創始莫考何昉而想其立廟之意訪諸故老遺言蓋以桑乾自城之北而西而南環抱巽方此廟巍然坐鎮所以壓波濤之洶涌使水勢不爲東門患也惜乾隆十七年重修後鳥鼠之竄伏者多風雨之剝蝕者久正殿雖存而彫敝金身雖在而蒼涼東西廓房概置之無何有之鄉非有以修葺而補苴之不惟無以妥神靈亦且無以肅觀瞻也由甕城中門而入不數武有馬王廟三間坐北向南與中門屹然相對鐘樓在其東大門列其前居民每逢聖誕之日設供獻牲祈神默佑蓋亦養牲者所賴以蕃昌之一助也自重修於乾隆三十後頻經大雨淋漓墻垣傾頽鐘樓摧折金碧不顯其輝煌輪奐悉歸

於寥落與中門外 帝君廟同一荒涼景象不堪回首矣都人士日擊心愴思兩廟仍循舊制重新古蹟奈工程浩大不得不爲將伯之呼願四鄉積善君子共勉襄盛事共署芳名以成美備於不朽云爾

懇留縣治

邑人田 霽

爲再灑輿情祈恩垂憫始終曲從民便事竊維馬邑一縣名爲下邑實係嚴疆並非冗設其形勢之攸關卽民情之所向久要鑒察屢荷經全前縣行查之文各屬詳覆之義凜然在案無事贅呈屆茲未逾五年情形並無今昔之殊地方復有裁併之舉君國大事原非草野所敢干與惟是王道本乎人情民生關乎國計利不什不變法害不什不易制馬邑雖小積久相安糧賦從無逋欠訟獄不致繁興惟以邊鄙窮塞缺分清官司土者每有去此適彼之思不知瘠土荒區各省皆有豈能一一而革之且官猶母也民猶子也子不嫌母之醜母豈棄子之貧而乃使數千年之封疆淪爲廢地百餘里之庶士永作鄉人遷其社稷神矢憑依毀其壇壝鬼將安妥而揆之守土之義子民之心似亦有不安者從前裁併清源民不樂從釀成巨案大人如傷念切豈肯使無告窮民獲

非上之愆乎今我國家聖聖相承光華復旦實爲千古吉祥盛事薄海內外莫不歡欣鼓舞共慶生成而乃使寰邑群黎獨抱向隅之想大人懷一夫不獲之憂從所惡勿施之念必忍不出此也况改例近於更張裁汰亦非嘉事朝廷之版圖日闢日廣邊鄙之防範愈密愈嚴大人偉績鴻猷久膺簡在秉鈞調鼎

伏乞破格施恩乘時布化

延邊境於一線緩程驛於片時倘得經理無虧還望振興有日功同再造敢戴二天惟有父誠其子兄告其弟急公向義勉爲守分良民勤業安居勿致疑憂命吏戶祝鴻祉於不朽身受樾蔭於無窮矣田稷等桑梓情急豐腴念切葡萄原非得已呼號實撫所求尙冀哀憐勿嫌瑣瀆闔邑士民老幼男婦曷勝急切待命之至謹呈

招商入籍

邑人陸岱

寰州地廣人稀土瘠民貧耕耨難遍錢糧易逋雍正十三年前任張父母招種忻崢詳明上憲批詞云必實來安插開本處原籍許本身及子孫應試其及弟侄概不准考憲批煌煌誰敢隕越不料忻崢之人無心安置任意作奸每偵試期輻輳而至長鎗冒濫無從稽查試畢仍面兩處影射以致錢糧無比較之戶學校滋頂替之階荏苒十年弊

竇百出恭逢我公滇南庚子舉人季大老爺甲子仲秋來涖茲土甫下車問民間疾苦  
闔邑士民以忻嘯考試沓雜紛冗請革弊端陳情蒙我公可其請已口碑道今歲考試  
忻嘯絡繹如前齟齬照舊我公冰心甄別雅意澄清矢慎矢公不絀不競宜考者錄取  
被黜者不收使扣盤捫燭之徒飄爾遠奔雖提槩懷鉛之輩嗒焉偃蹇邑士民歎呼謹  
頌者合口同詞願著石章永垂來茲不特戴我公革弊之恩于不衰且以關忻嘯之心  
勿蹈前轍也釀金襄事邑中踴躍爭光不數日而事舉僉屬文于岱自愧駑鈍不材邯  
鄲學步謹謝不敏屬愈力不得辭焉因刻原詳批詞並解囊花名于後以諭來者第患  
學問無成不慮功名未就則賢父母革弊之政篆于碣不啻銘于心悅之無窮曷如傳  
于不朽云

子午谷

文林郎馬邑知縣西京曹玉珂陸海

諸葛武侯之復中原也將出漢中魏延獻策願假精卒五千從子午谷直達長安攻其  
不備十日可以成功武侯以爲險計不用延見出師祁山未克奏膚每語人口丞相若  
用吾言早得長安矣後之論者亦以不用延計爲武侯之失算此皆不明地利之言也

流寇闖賊者東用延是策從蜀中出子午一入山中鳥道蜿蜒登如升天下如墜井砂石峻嶒銛逾劍戟馬蹄皆穿露骨噴膏斃者擁路且曠日彌久人無火食中道自悔險不可退矣山中有胡姓者從間道密報于孫公大司馬止以麾下弱卒數千人候于峪口寇雖萬衆突然而出人不勝挺馬不勝鞍官兵殲之殆盡遂擒闖王獻俘闕下寇氛從此少衰其副將殿後聞巨魁被獲未敢出峪止率數十人扳藤附葛從他道逸去夜襲商南因而蔓延入楚不可復制識者曰使孫公得數千兵伏山防其他縱則殿者同無噍類矣後知闖將入商亦如曹至泰山欲自殊者數數苟有人扼險豈能烏度耶此雖天數亦人謀之未周始知武侯不用延計誠有灼見後人妄憶多見其無識也

案賢宰曹明府之作甚多錄一以爲讀史者進一解

贈通明上人序

田天祚

寰邑地貧而人不喜施故蘭若邱墟僧寮冷落有通明大師者本儒家子依佛北遊雁門遂卓錫於邑之武廟初駐跡邑人咸爲師憂以爲此區區者安能作袈裟一襲地耶師爲杜門焚香不苟發言笑人皆以俗聞黎目之閱一載隣於師者謂師賢已而闔邑



亦道師賢久而窮鄉僻宇無不稱師賢且謀所以妥師居而裹師腹不數月而助金助材者不煩齒頰力始而廊宇成既而禪廬就輪焉煥焉竟爲吾邑別開生面前後費幾二百金夫吾邑貧瘠金錢不易若非師之神化淪於肌髓又安能得之易易若此耶而師初無異行不過杜門焚香而已昔韓昌黎首闢佛老而獨爲僧人作序蓋闢佛者恐人誤入於歧途而序僧者以僧有功於人世也今邑中官紳士庶欲頌師之賢余故不揣固陋而樂爲之序云

遊小湖天記即霍家庄

田天祚

戊子季夏之六日霍子繡園招飲於城西水村同遊者十一人緩步西郊沿流北上是日也小雲初霽嵐光如洗輕風拂面微塵不起過小泊墅渡桑乾水乃登彼西鳥開筵於小湖天之隈山翠當窗泉聲聒耳席地爲茵依亭作几水陸紛陳饌豐酒美同人俱欣笑鼓舞縱橫椅徙俯溪山之勝概談黃農之古語客有善歌者緩板輕簫響徹汀芷於是游魚起躍林鳥低止樵童牧豎相聚而嬉致足樂也夫吾邑地處窮邊而山水廻環縈繞極瀟灑之致獨恨無栽培點綴之功少名人高士之跡以致淪沒於荒煙蔓草

間殊爲山靈減色假令生居吳越安知不興杭之西湖蘇之虎塢並駕齊驅日醉飽於畫舫簫鼓之側乎憶余少時雖足跡偶一過此然不過假遊觀以縱其佻健之憶耳而山之情水之韵未能領略其奧妙今倦遊回復尋舊勝如獲故人而綢繆慙倦之意倍勝於前故於此遊也旣歌之咏之而復記之與恐山水有知反笑余鬚眉之非昔也

力農說

田天祚

農爲國本衣食所自出故禮重三推天子必親然胼手胝終歲勤動紈袴之子遊惰之徒畏而不屑道焉詎知重華著歷山之蹟阿衡起莘野之踪南陽布衣躬親耒耜汾水文人身戀敝廬從古英雄豪士之寄情畎畝者可勝道哉况農之爲事也勞久勞則思善農之爲利也微利微則思儉善能保身儉可興家且婦子聚於一室無江海奔馳之險親族日相親近有守望相助之益歲時雞黍伏臘羔羊又有渾穆太古之風焉每當禾黍如雲稻梁成島左顧右盼何暇南面百城時而輕歌四野膏雨一犁短衣斗笠倚徙於涼風蔭柳之下真不啻羲皇上人矣若夫餘一餘三千倉萬箱家擁豐盈惠及里黨者是又得農之聖而造其極者焉

明誥贈通奉大夫陝西左布司使商賢田公墓誌銘

進士趙鸞

正德甲戌春二月十三日通奉大夫陝西左布政司使田公以疾終於正寢仲子九霄泣血持狀請誌於予予與公側鄉戚之雅且受德殊深義有不容辭者謹按狀公諱彭字商賢世爲馬邑系祖諱整妣王氏創業克勤父諱鳳母杜氏俱以公貴贈奉直大夫宜人咸有令德公自幼奇邁充邑庠弟子員以明經中成化庚子鄉試越辛丑登甲辰進士觀工部政歲乙巳間祖母王氏喪公以適孫承重依禮守制還鄉卜葬事始終無踰禮三年間杜門痛坐朝夕四時惟恪恭祭奠而已此外無他爲歲丁未秋服闋遂擢戶部江西司主事六年餘政績超著復陞雲南司員外郎迨丙辰歲十二月初六日母太安人杜氏以病終於都下公悲號懇切擗踴踰情衾歛後歸故里扶柩葬於祖塋終三年咸如祖母制故事服闋遂擢廣西司員外郎不踰月擢貴州司郎中己夫冬北虜犯遼東境皇上軫念邊患命公領協嚴督糧草事畢復命庚申適漕運稽延京倉告急復領勅於儀真通漕等處立法誓衆宿弊一革運事果大通復命後越辛未又值北虜跳梁於陝西延綏等處領勅整糧草前後柱車間威德振衆公廉肅令譽孔彰癸亥冬

遂膺簡命授河南省衆議時巡按楊公以公才望兼署省省事之繁暨總督京倉及歲儲及請仍戎重務不二載陞貴州省左參政撫字苗民聲稱愈峻未幾復陞陝西右布政移檄漢中等有兵之孽公往治之用周三軍之急不久左布政司缺員朝廷擢公銓補學階一年餘殄絕貪酷之途崇廉介之行雖一錢之罰必揆之以道不妄周也以故政化洋溢合著德之方興未艾病篤一朝久醫弗愈乃聞其事於上秉君鈞營軸者復以大藩難治不忍公謝事至再至三乃議公以致仕調養俟用大任於後正德癸酉春書錦鄉邦惟以詩書訓子孫素履未嘗輕動不期疾轉沉重奄忽長逝古之人有言曰事君能致其身又曰琴鶴自清圖書載篋可以對人言可以告天知公其以之遡公生於景泰四年癸酉五月二十一日享年六十有二歲配王氏北京光祿寺署丞王公之四女贈宜人德與公等先卒繼配王氏涿鹿衛指揮王公之妹亦先卒繼配適先配者之妹壺儀嚴肅相夫子以道者甚悉誥封宜人昆玉四人公居長次日彰曰彧曰彤各配名家長子九臯尹氏俱先卒次九霄配金氏先卒繼配李氏有賢德女一適本縣隱士白晶姪男七人田九疇九功九叙九思九隆九惠九德孫男二長曰如山聘馬邑所

千戶陳公之女次曰如崗在齠齡孫女三長許字於本縣金公之仲子次俱在室是年四月四日爰葬公於縣城之南沙龍灣從祖兆也嗚呼公之生也事業赫於當時公之歿也聲華揚於後世國家少柱石之資鄉邦起哲人之念是宜爲之銘曰 山川英氣 公實鍾先 遡公階秩 大藩終年 聖世魏科 公早克全 絢然誥勅 光焰九泉 始終節操 仕宦恬然 清白一德 終守心田 勒諸方石 後裔永傳

清誥贈中憲大夫阜海田公墓誌銘

漂陽狀元高世俊

余年伯阜海田公以疾終于家其嗣君子湄聞親之喪哭答使者以身爲侍從之臣非命下不可不行乃設奠位于京邸余往唁子湄子湄哭失聲哽咽不能語越三日乃泣而告曰哀哉先子事親以孝事兄以弟而待鄉黨嫻戚以誠信也先子懷才慕道而未尺寸展其同也哀哉教子勤苦而未得一日之養也兒官于京而不得親聞其易簀之言也是皆可痛鉅而創深者子湄方在苦塊余時不敢詢公平生之詳已而覽公行狀則子湄手錄也錄其一二大節而瑣細不載以不足爲公重云諱大稔字阜海馬邑之望族也豪武雄迅之地而田氏獨以科名起家曾祖彭由甲辰進士爲陝西大方伯以

直著父世芳克世守前業教授于平陽之降郡河東人士翕然宗之以德望著父嘉種號養寔爲諸生于二十人中以文行著母張氏養寔公三子長大豐爲鄉祭酒李逆犯境罵賊不屈死以節著次大成國子生弱冠早逝公爲季子生而穎異讀書十數行下十三歲補博士弟子員少失怙以家務拮据不能治舉子業事母張氏晨昏無間甘旨滫瀡柔色以進三十年如一日也年伯中年無子公割愛子爲兄嗣及兄殉難嫂獨守煢然公爲經營門戶教侄成立爲邑諸生蓋公居家之大節如此至于質實寬厚直追古人不喜奢靡炫俗亦不刻意驕飾而人踳踳赴赴尤孰族誼凡婚嫁喪祭不能自舉者籌畫悉如己事其有瑕疵隙嫌一言解之皆厭服去蓋公睦族之大節如此子湄之舉於鄉也公諭之曰自方伯公以清白貽汝而汝祖以詩書訓族當時族人貧不能讀書汝祖身爲之師多所造就汝勉哉士服高曾古人之格言蓋其訓子孫之大節如此子湄旣成進士新天子特重中秋之選較他科爲嚴正拔庶常十人而子湄爲之率欲迎公入都朝夕奉侍而公以母年已八十餘不忍就子養以貽母憂千里貽書于子湄曰汝盡臣職于國我盡子職于家足矣嗚呼孰知此卽公之遺命也歟公生于萬曆

庚寅春正月二十七日戌時卒于康熙壬寅年夏四月初三日酉時年五十三歲配梁氏山陰貢生任山東夏津縣梁公美器女子四長卽子湄也諱喜囊辛丑進士現任內宏文院庶吉士娶符氏以辛亥十月初四日葬公縣南二里許上原銘曰惟德惟義公也無愆惟詩惟書公也可傳惟子惟孫爲公大年有石之屹立而常堅嗚呼是爲百世之阡 康熙元年

清例授修職佐郎霍公教思碑記銘

馬邑 訓導 吳觀亨 介休 舉人

公諱百齡字壽山號嶽淵馬邑歲貢生也少明敏讀書警晤遊庠後歲科試恒列前茅其爲文濡筆伸紙數百言立就歷任學博咸器重之舉優行咸以天性孝友爲考語赴秋闈者僅四次以高古未獲售年三十七貢成均就教職朱提學以品學兼優賜匾額且賜聯云好事竟從難處得高情自與俗人殊蓋美其修學有功而聞州守練江姚公以不愛錢者許之也霍之先自元末由豐州遷馬邑歷明紀及國朝科名焜耀印纍纍綬若若名儒顯宦載在通誌及邑乘族譜中尤詳十三傳高叔祖諱儀泰以進士任粵東縣令性侃直忤上憲致仕歸高祖諱位喬以選拔任州判江南歷署知縣印事宦遊

幾三十年清風兩袖卒於官篋有藏書囊無私積曾伯祖諱誰以江南典使陞主簿自此家世中落曾祖諱襄祖諱裕豫皆以廩膳終而書香似續不失爲儒素家風父諱鳳德以歲貢候選學博不果而卒公失怙弱不好弄事霜母田孺人先意承志與弟富齡公相友愛年十七隱童子試輒冠軍本府崔太守甚加矜賞遂採芹旋食餼太孺人喜曰幸哉有子庶堪繼武前人矣所惜者書城日擁食指浩繁終歲舌耕與弟躬耕所獲猶未足供高堂甘旨奉太孺人旋終堂公哀毀踰禮恨不以科名慰母氏志越數歲季弟歿抱痛脊令殯葬罔不竭情以經營且視侄猶子婚娶一切不致失時久曠至邑中公務莫不推公爲首倡而最關心者尤莫如學校先是文廟傾頽宮牆幾鞠爲茂草公慨然曰馬邑旣縣爲鄉矣所有一綫遺留者獨此學校耳文廟若廢學校何賴以存乎乃協同姚公璉等重修歷六年而功始告竣厥後修學署修明倫及敬一亭諸工務公等與有勞焉而稟性尤慷慨且勇於爲人光緒三年史公紀司鐸茲邑歲大稔貧乏幾不能自存公首發慈悲與姚公璉率遠近村莊弟子員簞食壺漿以饋遺之俾史公得稍自安而告歸乃至年與者何莫非公之力也夫以公之才情之英敏學問之殷勤而



更濟以德性之敦厚，倘得優遊歲月，簡練揣摩，不至艱屯棘闡之戰，將擢巍科，登顯仕，文章經濟不難與前世名焜燿於無窮。乃一困於家計之瑣屑，再困於世務之應求，三困於童蒙之啟迪，硯田作苦，戶外之屨常盈，館穀雖豐，囊中之積無幾。卒令公不克繼續前代科名爲遺憾，而人亦以此代爲公憾也。惜哉！然公之學日進口誦，手錄者幾等身也。其誨人也循循善誘，不憚舌敝唇焦。每至夜分不輟，故經公指授者莫不各有所成就。倘所謂大匠之門無棄材者，非耶？公之卒也，病泄痢，屬續前一日猶手撫方書筆錄之，且以留心醫學囑其子。所謂好學不倦，一息不容少懈者，其在斯人乎？公生於道光六年二月十七日，卒於光緒十三年六月二十四日，享壽六十有四歲。德配田孺人。子一，今告窆有期，羣弟子感公之教，思樹碑表誌以示不忘。丐辭於余，余誼不容以不文辭爰錄其梗概而紀畧。銘曰：英年樹職，誰與角鬢宮翔步羈駿足貢入蘭臺，躡斗斛桃李春風化兩沐，旣耕已種書還讀。巫陽下招，悲何速九原一事至公，祝子孫青雲堪似續。

月課士子榜文

馬邑訓導李春榮太原舉人

馬邑星分畢野地屬寰州漾龍池之錦浪黃道疏泉循馬跡以環城紫金列岫漫云塞  
近龍堆夙稱用武競羨林多鸚集久著能文周伯况鼃池匿迹不事王侯李文穆儒籍  
成名同知制誥經童學裕精微著易簡之篇史冊垂名忠肅重文卿之謚况我國家化  
冷薪薰俊升蘭芷霍舍人范縣梯雲克繩祖武田學士經筵捧日登沛皇恩雷山不改  
先民之懿範猶存灑水長流繼起之人文未艾或探異書於石室或攻時藝于芸窗或  
循其正規不愆步伐之齊或勝以偏師獨擅新奇之訣意年來秀拔文壇羣擬及鋒而  
試乘此日弘開學舍正堪磨礪以須本學隴西舊族汾石庸才幸秋桂之先登八枝已  
折奈春園之屢困六薦皆虛錢遇選青謬獲廣文之職心期布赤敢云振鐸之司愧無  
仙術焉能點石成金綽有癡情竊願拋磚引玉爲此仰門斗徧示題單望諸生各交課  
卷惟願芹宮妙手羣舒修鳳之才更茅屋奇秘雕龍之技雖披羅之網空憐滄海珠  
胎而光彩騰霄猶識豐城劍氣慙窺全豹之斑敢矜管見快覩漸鴻之羽預賀梯升幸  
爾肯來勿予遐棄

慈母石歌

見江蘇府誌乾隆三十年霍嵩宦江蘇時錄之歸而付梓

岩石江頭峻如壁舟人指爲慈母石慈母名來不可聞岩崖屹壓秋江碧我聞慈母名  
起我父母思人有父母誰不思我思父母偏傷悲憶昔生我童穉時家貧日逐圖生資  
父母依我兮寧自寒父母食我兮寧自飢爨薪與我代燈燭鬻衣與我買詩書朝夕撫  
我俾勤學戒我勿作庸常兒天生我命苦多疾父母提携延歲月一旦我病忽呻吟父  
母呿啞面如漆有時與我祝神祇要見我着藍肥衣是時我心常感發願如孔子言無  
違嗟哉命運亦何蹇少年不第第亦晚使我父母老死時食不飽兮衣不煖我今方爲  
一命士薄祿猶堪供旨甘二親已去掩荒邱俸祿反將飽妻子幾回舉筋食鮮新哽咽  
不覺淚雙垂拭淚常將酒杯奠酒杯不到英靈前慈母石世罕有汝在江頭天地久我  
思父母不能養此恨常同汝不朽嗚呼罔極恩難報于今賴有移忠孝便當竭力事吾  
君庶可揚名酬二親

飲馬長城窟行

唐太宗

塞外悲風切交河冰已結瀚海百重波山陰千里雪迴戍危烽火曾巒引高節悠悠卷

旌旗飲馬出長城寒沙迷騎迹朔吹斷邊聲胡塵清玉塞羌笛韻金鎮絕漢干戈戢車  
徒振原隰都尉反龍堆將軍旋馬邑揚麾氛霧靜紀石功名立荒裔一戎衣靈臺凱歌  
入

悼亡弟

同治十一年  
諱富齡字文山

邑人 霍百齡

嗟予偃蹇命不如孔懷之樂長已矣予弟少我齒三齡同胞何不同生死萱堂恩養德  
如天謝却慈幃二十年花萼相輝皆故事壘篋欲奏染黃泉當年母愛珍於寶暗禱吾  
兒得壽考此心盡在不言中天將瑣事催人老可惜從前轉念差教書不算美生涯文  
武兩衙偕辦事人亡財散毀吾家思昔盧氏深景仰房師欲得見聞廣我在雲時力阻  
攔在大同  
送考旁人但說平如掌軍興旁牛苦傷神軍冊煩多不靠人共苦分甘輕小利闔  
營武弁友其仁入營之年戶科易交相推遜兼其役銖兩毫厘不許差予心私歎爲蹙  
額分餉由來到山陰山陰去去自沈吟牛官派取眞君子步履何來載驟駸一心兩用  
已貽戚學書代理尤兢惕忙來竟夜不成眼爲取錢糧救飢溺壬申歲試忽匆匆告假  
州城送小童病得牙疼三日夜州城僵臥又忡忡侄兒應試心偏喜引見榮師愛子侄

侄兒場事未及完交銀歸見徐外委歸家此夜不安康府憲催文莫敢違並無水漿曾  
入口何來安枕夢高堂試罷携兒返故里苦無車脚倦行止入門聞道叔傷寒明晨診  
視已不起奄奄氣息受心勞盼請名醫藥煎熬剛令侄兒毛道去嗚呼已了棄兒曹福  
善從來有天道胡爲予季終潦倒歿年四十有五齡鵲鴿哀斷烏啼早年來搔首問青  
天官債已賠負郭田從今誰覓負心子但向墳頭化紙錢

生前無分文拖欠賣地  
神官錢三十餘千

集杜少陵詩

甲寅秋日窮愁特甚集杜詩十五首興道筆隨工拙不計也

羈旅知交態連年絕尺書荆扉深蔓草鄰舍與園蔬詞賦工無益兵戈久索居萬方頻  
送喜高枕乃吾廬

二

用拙存吾道乾坤一腐儒幽棲誠簡略意緒日荒蕪王室乃多故香醪懶再沽不才其  
朽質管葛本時須

三

馬 氏 集 二 下  
甲子西南異迴風吹早秋飄零爲客久浩蕩及關愁水  
社稷回首得無憂

城高絕塞樓向來論

四

江漢山重阻邊隅今若何唐堯眞自聖漢將仍橫戈絕域歸舟遠悲風日暮多願聞哀  
痛詔收取舊山河

五

北庭送壯士抄畧總兵機戰伐何由定雷霆可震威瞿塘夜水黑灌口米船稀故老思  
飛將哀調嘆短衣

六

將帥蒙恩澤孤城白帝邊收帆下急水輸粟上青天一徑野花落空林暮景懸深懷諭  
蜀意無處覓張騫

七

洞房環珮冷迢遞起層陰却寄雙愁眼况經長別心秋窗獨曙色雲嶠憶春臨故老仍

流涕沙邊待至今

八

吳楚東南坼誰知百戰場草深迷市井沙岸繞微茫何日通燕塞無勞問越裳惜哉形勝地百里獨蒼蒼

九

戎馬交馳際孤城早閉門路衢惟見哭商旅自星奔已墮峴山淚難招楚客魂何時一茅屋耕稼學山材

十

王室北多難扶持在數公君臣當共濟邊徼尙灣弓感激張天步蹉跎効小忠從來謝太博憂國願年豐

十一

閣  
乘時各有人九重思諫諍萬役但平巧哀痛絲綸切瘠瘼府庫貧向來憂國淚鏤骨抱酸辛

十二

至尊方旰食凡百慎交綏邦以民爲本兵殘將自疑雖尤終截辱百姓日支離借問懸車守恐貽識者嗤

十三

盜賊還奔突幾時懷抱寬至今勞聖主每日報平安洛下舟車入巴西道路難願聞鋒鏑鑄豈敢惜彫殘

十四

授鉞親賢往長防萬里秋蠶崖鐵馬瘦歸路晚山稠慎爾叅籌畫從容仰廟謨夷陵春色起心折此淹留

十五

元帥歸龍種高風卷旆旌亂離還奏樂取次莫論兵且喜河南定何曾劍外清尙思訶吹入走馬向承明

內閣學士馬邑田喜霖



咏桑乾

祝 頤明以前人

金龍池畔水演作桑乾河東馳入滄海浩蕩成洪波誰知稽天流發源始盈科覽物感  
人事防微當若何

金龍池五言

龍池傳往古汎湧繞邊城雲散煙波靜晴開水月明樹搖波影動鳥宿浪頭平龍馬傳  
池出虎臣自有名

寰州八景詩

乾隆庚辰

田天錫

洪濤雨霽

洪濤藩北郭雨後矚高岑爽氣開林表風雲失塞陰紫蘗紅日 玉笋碧天森試問清  
晨望嵐光盪遠襟

桑乾冬煖

靈鍾桑乾水方冬好問津百川皆返結一派獨清淪愛日時遊鯉嚴霜不掩蘋汪洋橫  
朔野 助寒天春

櫓台遠眺

衛公臨眺處壯畧有遺台昔占星文燦今當曙色開盪胸連朔漠入眼小桑恢爲想龍  
山會高秋載酒來

龍池夜月

池水淨無塵月來清可匠魄凝素碧呈波蕩驪珠出俯仰共冰鑒乾坤歸練正我將學  
泛槎從此通蟾窟

文峯聳秀

孤峯如豎筆拔地勢凌雲雨藉揮毫潤苔添染翰紋迎空題雁字向日抹霞文好照此  
邦盛人文奕葉芬

玉泉秋聲

靈泉渾漱玉攬盛趁秋晴潦盡潭方潔山空賴輾清冷冷依雁響瑟瑟和蟬鳴不遇鐘  
期賞誰知流水情

神婆古蹟

何年駕紫雲會向層巒駐烟鎖飛鳧踪石留響屐數巫山但說雲台嶽終忘何似此  
山中千尋秋故步

西隱晚照

古剎踞形勝遺趾野趨侵天空  
新雨過地廠夕陽臨草色連雲闊  
煙光隔樹深落霞回映處彷彿見鋪金

讀鄂國公傳

白居易

高臥深山不見人功名抖擻似灰塵  
只留一部清商曲月下風前伴老身

謁鄂國公祠

萬代新

龍去池空 訴模徘徊遺像憶當初  
千金日月心難晦百戰山河體 圖赤手扶天還  
奪梢白頭分鎮更威胡碣村春盡年年草  
問繪凌烟肯冉無

雁門關外

元好問

四海于今止一家生民何處不桑麻  
重關獨據千尋嶺深夏猶飛六出花  
雲暗白楊連馬邑天圍青塚渺龍沙  
憑高吊古情無盡空對西風數去鴉

白楊門青塚龍沙皆馬邑古蹟

詠煤炭

明于謙

鑿開混沌得烏金，藏蓄陽和意最深。  
燭火燃回春浩浩，洪爐照破夜沉沉。  
鼎彝元賴生成力，鐵石猶存死後心。  
但願蒼生俱飽煖，不辭辛苦出山林。

櫓臺遠眺

乾隆年

陝西綏城

邑知縣

季由中閩樵

莽平沙突起懸台，堪詫嘆羈孤。許多愁塊直須眺遠瞻，遐理臘屐階除歷亂拋。節杖徑路欹斜，屋角蛛絲牆頭蝶粉，還兼瓦縫宿寒鴉。憑凌處並無疆界，目力何奢。眞空曠幾堆野樹，一抹晴霞。

更興嗟藥師遺跡，此時從何處尋耶。走問關書非小草，盼星斗眼不虛花。馬邑城頭桑乾水畔，誰將舊事上新牙。祇好望風懷想，慷慨把醪賒。猛思量窮徼絕塞茅屋人家。

過周令公祠

乾隆年

邑人田天錫

公諱德威，余邑人也。爲後唐名將，陣亡於魯村坡。今沁州斷柳坡也有墓，歸然鄉人祠而祀之。祠前雙槐蔽日，蓋數百年物。余過謁階前，題此以志景行之慕云。

古廟巍臨沁水東，相傳此地淚英雄。雙槐天建當年節，斷碣人旗身後功。諸葛遺師未

捷范增飲恨至主多蒙風塵若遇龔裘子王魏何望獨隆

櫓臺遠眺

毀菴李明府櫓台遠眺之作寄央高曠琢韻清新雪窗卽景試一爲之非敢言詞聊以學邯鄲之步耳

澄山川一夜瓊瑤鋪遍曾記得扇蒲衣葛臨流爭濯清漣朱明幾日纔辭令玄氛經宿  
盡乘權柳絮因風犁花帶雨都將玉階砌窮塵隔岸處茶煙漫遞高人自往還添了些  
野橋酒興驢皆詩箋

有多少數奇命悟際此能不潛然擁牛衣京兆薦草逐羊牧子卿嚙旃官閣梅舒繡幃  
人嬾誰把悲涼減笑嗎正好垂簾掃經結伴共開筵一任地孟浮蟻面鑪熱龍涎

乾隆丙子大江以南荒疫相連

宦江南時霍位喬嵩南作邑人

處處啼飢不忍聽况兼瘟癘更傷情千家僅有百家健今日難保明日生漫說慈悲憑  
上帝可憐飲慟滿江城救荒已是無良策驅疫仙方何處并

乾隆甲戌重赴江陰

不到澄江十二年依稀風景豈如前娥眉石咽江聲鬧鐵佛塵封蛛網牽歷練艱難成  
白首世路崎嶇見青天遺愁不解懷中物撫景徬徨懶欲眠

又

自別延陵轉瞬間黑頭人換白頭纏情知日仄無多景堪信人生有可憐閱盡艱難憑骨力行吾本等絕塵緣一身來往輕如鷗欲訴衷腸影在前

櫓臺夜月懷古七言

康熙年邑人田邵哲

宵靜風清意爽然登高仰見斗星懸雁塞雲關山影地桑乾月映水光天景物依然傷往蹟興亡幾變慨殘編臺存人去磨今古佇望徘徊少夜眠

過雁門

高望關樓似插天兩峯中割雁飛還屏藩要害雄三晉鎮鑰關防重九邊屈經盤崖妨草棘層巒疊翠罩雲煙遊人漫登巔上一望統山河指顧間

過桑乾

江南宣城人順治年進士字尙白施閏章

幾歲桑乾夜渡河金門持節又經過煙寒碣石鴻飛少霜早燕山木落多北望長安時駐馬南征荒徼正橫戈可憐輦轂平燕地細雨秋原散羣駝

儒學銘

萬曆三十五年宣大巡按御史直隸井陘人霍鵬

聖帝垂旒御九重偃武修文萬國同朔郡蟠紆紗漠中諸君鳩匠構學宮誰談聖道開  
羣蒙或爲繡虎復雕龍他年髦士得登庸好持儒術代天工

秋日登櫓台

邑人稟生中武舉田圻

登眺高台俯雉城川原歷落舊知名流雲不斷橫山白曲水依然繞郭青况是林開新  
霽後却當風過晚涼輕徘徊極目南飛雁嘹唳晴空三兩聲

新生填親供畫卷價光緒五年

我齋吳觀亨介休舉人

偶聞懸榜有餘歡把酒香生苜蓿盤但願花開皆富貴如同竹報盡平安方當夏暑腸

誰熱

考試在六月

未擲秋風十已寒此夕臣門喧若市低昂評價蠟頻殘

白首頻搔問蔚藍低徊往迹不勝堪瞽鯨何功生聖子勲華至德賢男

管蔡周康氣各含輪迴果報終歸幻千古同仁苦共甘

留別馬邑諸生光緒年

訓導張鶚舉絳縣舉人

三抑宮牆信有緣

三權馬邑學篆

韻光荏苒度華年

前後已二十載

相期勿負他山石

鑒于明堂後有四字

敢謂曾居

讓水泉風月桑乾新話別星雲蒲坂各分天

推陞蒲州府教授

火車指顧通南北觀面重來詎偶

然

留別鄴陽諸生

小住鄴陽十七年鐸聲徇路愧前賢信無模範型多士差有愚誠懍上天樽酒論文何日再尺箋話別客懷牽風雲有志諸君奮願趁良時快着鞭

塞下曲

乾降年邑人田 霽

行行古戰場春盡水不波沙中飛白雀磧裏走明駝黑運臺長城窟馬上健兒輕似鵲捲蘆爲笛向天吹一聲吹落關山月

朔平府署館中

一

塞外荒涼別有天鄉城南望隔雲煙我來兩月愁如許蘇武何堪十九年

二

當年曾過永豐坊萬緒千條惹恨長誰道玉關春不渡邊城新柳正鵝黃

三



東風吹起滿城沙二月郊原未放花惟有綠楊春意早已隨小草發新芽

馬邑竹枝詞

咸豐年 邑訓導李春榮太原舉人

一

櫓台百尺聳雲霄乘興登來破寂寥猶是衛公觀虜處而今人聽水瀟瀟

二

桑乾冬日不生冰夜氣渾如釜上蒸每到清晨霏白雪瓊花滿樹綴層層

三

已過清明未見春黃瓜六月始嘗新纔逾溽暑無多日肅肅飛霜又逼人

四

書生也解務農功耕種由來世世同祇有一班間趣好夕陽影裏話幽風

五

農家婦女亦登場不織也能賦七襄餘粟賣來還易布淡敷藍色剪衣裳

六

腸腹難充面似灰傭工日日荷鋤來偶然談起文章事知是鄰封一秀才

七

飛沙粒粒打窗頭夏日嚴寒且勝秋豈是子陵風味在等閒五月尙披裘

八

每逢秋賽鬧喧嘩女樂登場舞態斜好劇不須優孟演彼妹會唱後庭花

九

征途絕少樹陰涼一望黃沙路苦長遙指前村難計里行行不住到斜陽

十

自古農人恨少田誰知田廣遇荒年欲逃積欠官家稅聊向隣封受一廛

馬跑泉

在蕩廣武西山頂俗言馬跑石上出泉形徑尺其水不流亦不涸是亦奇觀俗傳昔有李三娘担水于此然時代無稽

邑人張顏卓立如

懸崖峭壁勢倉倉石上小泉歲月長不識誰來勤汲水鄉人猶說李三娘

絮舞花飛春日暮閒遊直入深山路携伴同行兩三人聚足登高喜聯步甫臨半腹仰

息肩聞說上有馬跑泉不覺感懷逸興發攀崖定欲到層巔一步果然經九折絕頂石盤平且潔清泉有水靜不流蕞爾勢如馬蹄穴小坐忽逢人牧羊笑言担水李三娘幸賞奇迹聞奇語奇到回車歎王陽靈運當時著屐齒荆襄峴山羊叔子我輦却莫苦峙  
嘔枕流漱石美不美歡笑無已繼歌聲薄言旋歸故道行把臂下山俱  
廣武城

登舊廣武城歌

時教讀城中與同邑張君愨登而作

張顏卓

君不聞太白喜登鳳凰台吳宮晉代騁詩才仲宣獨登江陵樓懷歸作賦日悠悠嗟予有志生苦晚未與古人偕往返小約同儕徒望遠女牆斷續不能遮昂頭縱日到天涯南望形勝雁門關紫金筆架相廻環北眺家鄉近古寰村邊似壓靈頭山

冬夜夢父覺而傷懷

張顏卓

一  
自別音容五六年思聞笑語淚潜然今霄入夢來魂魄似覺痴兒實可憐

二

自幼提携入學堂夜同衾枕晝同牀憐兒久作他鄉客嚴父權兼慈母當

三

夢中情狀想非非久客他鄉今似歸笑貌若離還若卽歡言相契莫相違趨庭猶記當年訓就榻何期此夕依早識酣眠能面父蘧蘧願化蝶長飛

一陽月望前三日思母悲懷

張顏卓

一

白髮垂垂兩鬢挖愁容淚眼日蹉跎艱難都爲痴兒受教養子孫不孝多

二

衣單衾薄且粗餐日守篷窗難更難况是暮年筋骨瘦不知怎耐一冬寒

三

他鄉教讀是生涯遙憶慈顏別恨奢依得門閭終日望計過冬至可還家

